

宋

史

百三四



列傳卷第二百四十四

宋史四百八十五

開府儀同三司桂國鎮國軍事前書右丞相監修國史領經筵事都總裁_臣脫等奉

勅修

外國一

夏國上

昔唐承隋後隋承周齊上邇元魏故西北之疆有漢
晉正朔所逮者然亦不過使介之相通貢聘之時至
而已唐德既衰荒服不至五季迭興綱紀自紊遠人
慕義無所適從宋祖受命諸國削平海內清謐於是
東若高麗渤海雖阻隔遼壤而航海遠來不憚跋涉

西若天竺于闐回鶻大食高昌龜茲拂林等國雖介
遼夏之間筐篚亦至屢勤館人党項吐蕃唃廝囉董
氈瞎征諸部夏國兵力之所必爭者也宋之威德亦
暨其地又間獲其助焉交趾占城真臘蒲耳大理濱
海諸蕃自劉鋹陳洪進來歸接踵修貢宋之待遇亦
得其道厚其委積而不計其貢輸假之榮名而不責
以煩縟來則不拒去則不追邊圉相接時有侵軼命
將致討服則舍之不黷以武先王柔遠之制豈復有
加於是哉南渡以後朔漠不通東南之陲以及西鄙
冠蓋猶有至者交人遠假爵命訖宋亡而後絕焉女

直在宋初屢貢名馬他日疆大脩怨於遼其索叛臣
阿疎責還所掠宋詔猶知以通宋為重及渝海上之
盟尋構大難宋遂為所絀辱豈非自取之過乎前宋
舊史有女直傳今既作金史義當削之夏國雖徇鄉
不常而視金有間故仍舊史所錄存焉

李彝興夏州人也本姓拓跋氏唐貞觀初有拓跋赤辭者歸
唐太宗賜姓李置靜邊等州以處之其後析居夏州者號
平夏部唐末拓跋思恭鎮夏州統銀夏綏宥靜五州
地討黃巢有功復賜李姓思恭卒弟思諫代為定難
軍節度使思諫卒思恭孫彝昌嗣梁開平中彝昌遇

害將士立其族子蕃部指揮仁福仁福卒子彝興嗣
事具五代史彝興彝超之弟也本名彝殷避宋宣祖
諱改殷為興初為行軍司馬清泰二年彝超卒遂加
定難軍節度使晉初加同平章事開運初契丹授西
南招討使漢初加兼侍中周初加中書令顯德初封
西平王世宗即位加太保恭帝初加太傅宋初加大尉
北漢劉鈞結代北諸部來寇麟州彝興遣部將李彝
玉會諸鎮兵禦之鈞衆遂引去建隆初獻馬三百匹
太祖大喜親視攻玉為帶且召使問曰汝帥腹圍幾
何使言彝興腰腹甚大太祖曰汝帥真福人也遂遣

使以帶賜之乾德五年卒太祖廢朝三日贈大師追

封夏王子克睿立

克睿初名光睿避太宗諱改

光為克彝嬰卒自權知州事授檢校太保定難軍節
度使開寶九年率兵破北漢吳堡砦斬首七百級獲
牛羊千計俘砦主侯遇以獻累加檢校太尉太平興
國三年卒太宗廢朝二日贈侍中子繼筠立

繼

筠初為衙內都指揮使檢校工部尚書克睿卒自權
知州事授檢校司徒定難軍節度觀察留後太宗征
北漢繼筠遣銀州刺史李光遠綏州刺史李光憲率
蕃漢兵列陣渡河畧大原境以張軍勢太平興國五

年卒弟繼捧立

繼捧立以太平興國七年率族

人入朝自上世以來未嘗親覲者繼捧至太宗甚嘉之賜白金千兩帛千匹錢百萬祖母獨孤氏亦獻玉盤一金盤三皆厚賚之繼捧陳其諸父昆弟多相怨願留京師乃遣使夏州護總麻已上親赴闕授繼捧彰德軍節度使并官其昆弟夏州蕃落指揮使克信等十二人有差遂曲赦銀夏管内太宗嘗宴群臣苑中謂繼捧曰汝在夏州用何道以制諸部對曰羌人驚悍但羈縻而已非能制也弟權知夏州克文來朝以唐僖宗所賜其祖思恭鐵券及朱書御札來上改

博州防禦使初繼捧之入也弟繼遷出奔及是數來
為邊患有言繼遷悉知朝廷事蓋繼捧泄之乃出為
崇信軍節度使克憲為道州防禦使克文遣歸博州
並選常叅官為通判以專郡政端拱初改感德軍節
度使屢發兵討繼遷不克用宰相趙普計欲委繼捧
以邊事令圖之因召赴闕賜姓趙氏更名保忠太宗
親書五色金花牋以賜之授夏州刺史克定難軍節
度使夏銀綏宥靜等州觀察處置押蕃落等使賜金
器千兩銀器萬兩并賜五州錢帛芻粟田園保忠辭
日宴于長春殿賜襲衣玉帶銀鞍馬錦絲三千匹銀

器三千兩又賜錦袍銀帶五百副馬百匹至鎮數月上言繼遷悔過歸款乃授繼遷官然實無降心也二年加保忠特進同中書門下平章事淳化初與繼遷戰于安慶澤繼遷中流矢遁去保忠乞師禦繼遷遣商州團練使程守素率兵援之賜保忠茶百斤上醞十石乃獻白鶻名海東青以父罷畋獵詔慰還之五年繼遷攻靈州遣侍衛馬軍都指揮使李繼隆討之保忠先挈其母與妻子避野外乃上言與繼遷解怨獻馬五十匹乞罷兵帝覽奏立遣中使督繼隆進軍及兵壓境保忠反為繼遷所圖欲併其衆縛牙校趙

光祚襲其營帳保忠方寢聞難作單騎走還城為大
校趙光嗣閉於別室旦開門迎繼隆乃執保忠送闕
下待罪崇政殿庭帝詰責數四釋之賜冠帶噐幣并
賜其母金銀噐以撫之尋責授右千牛衛上將軍封
宥罪侯賜第京師保忠狀貌雄毅居環列奉朝請常
怏怏不自得咸平中丁內艱以本官起復遷金吾衛
上將軍判岳州移復州景德元年病劇上言有子永
哥不肖乞配春州帝以其病語乃授永州別駕詔監
軍察之尋卒贈威塞軍節度使克文亦死贈岳州防
禦使天禧四年錄其孫從吉為三班奉職

繼遷

繼捧族弟也高祖思忠嘗從兄思恭討黃巢拒賊於
渭橋表有鐵鶴射之沒羽賊駭之遂先士卒戰沒僖
宗贈宥州刺史祠于渭陽曾祖仁顏仕唐銀州防禦
使祖彝景嗣于晉父光儼嗣于周建隆四年繼遷生
于銀州無定河生而有齒開寶七年授定難軍管內
都知蕃落使繼捧之歸宋時年二十留居銀州及使
至召總麻親赴闕乃詐言乳母死出葬于郊遂與其
黨數十人奔入地斤澤澤距夏州東北三百里太平
興國八年知夏州尹憲與都巡檢曹光實偵知夜襲
破之斬首五百級焚四百餘帳繼遷與其弟遁免獲

其母與妻繼遷復連娶豪族轉遷無常漸以疆大而西人以李氏世著恩德往往多歸之繼遷因語其豪右曰李氏世有西土今一旦絕之爾等不忘李氏能從我興復乎衆曰諾遂與弟繼冲破丑重遇貴張浦李大信等起夏州乃詐降誘殺曹光實于葭蘆川遂襲銀州據之時雍熙二年二月也三月破會州焚毀城郭而去三年遼以義成公主嫁繼遷用為夏國王四年知夏州安守中以三萬衆戰于王亭鎮敗績繼遷追至城門而返端拱元年繼捧之節制夏臺言能歸款即授洛苑使銀州刺史淳化初復與繼捧戰于

安慶澤不利轉攻夏州繼捧乞師及翟守素來及奉表歸款授銀州觀察賜名保吉子德明管内蕃落使行軍司馬淳化四年轉運副使鄭文寶議禁鹽池用困繼遷數月邊人四十二族萬餘騎寇環州屠小康堡太祖乃遣錢若水弛其禁因撫慰之五年正月繼遷徙綏州民于平夏部將高文岷等因衆不樂反攻敗之繼遷復圍堡此石掠居民焚積聚遂攻靈州詔遣李繼隆等進討繼遷夜襲保忠走之獲其輜重以歸七月乃獻馬以謝又遣弟廷信獻馬橐馳太宗撫賚甚厚遣內侍張崇貴詔諭賜茶藥噐幣衣物至道初

遣左都押衙張浦以橐駝

良馬來獻太宗令衛士

翹關超乘引彊奪槊於後園俾浦等觀且令兵士皆
拓兩石弓帝笑問浦曰羌人敢敵否浦曰羌部弓弱
矢短但見此長大人則已遁矣况敢敵乎繼遷乞禁
邊盜掠詔令謹守疆場還所盜物遣閣門副使馮訥
中使賈繼隆持詔拜繼遷鄜州節度使不受乃以浦
為鄭州團練留京師繼遷表鄭文寶誘其部長鬼羅
嵬悉遂貶文寶藍山令繼遷以千騎攻清遠軍守臣
張延擊退之二年春命洛苑使白守榮等護送芻粟
四十萬于靈州且令車重先後作三隊丁夫持弓矢

自衛士卒布方陣以護之遇敵則戰可以無失復令
會州觀察使田紹斌率兵應援而守榮乃併為一運
繼遷邀擊于浦洛河紹斌不救衆潰運餽盡為繼遷
所得太宗聞之怒三年復命李繼隆為環慶等州都
部署會四方館使曹璨自河西至言繼遷衆萬餘圍
靈武城中上表告急為繼遷所得遂頓兵不去時朝
議或云率輕騎三道擣平夏或云暑涉旱海無水泉
糧運艱辛不如靜以待之帝不聽九月親部分諸將
繼隆出環州丁罕出慶州范廷召出延州王超出夏
州張守恩出麟州五路進討直抵平夏繼隆以環州

路迂乃自青岡峽遠靈武徑趨平夏兵行數日與丁罕合又行十餘日無所見乃引還張守恩遇之不戰而遁王超范廷召遇之于烏白池大小數十戰不利諸將失期士卒困乏繼遷復令軍主史不駐屯橐駝口以阻歸宋人繼隆遣田敏等擊之咸平春繼遷復表不順真宗乃授夏州刺史定難軍節度夏銀綬宥靜等州官察處置押番落等使加邑千戶實封二百戶益功臣號乃放張浦還復遣押衙劉仁謙表讓恩命詔不允賜仁謙錦袍銀帶尋遣弟繼瑗來謝恩授

繼瑗亳州防禦使封繼遷母衛慕氏衛國太夫人子

德明為定難軍節度行軍司馬未幾復抄邊四年麟
府副部署曹璨率熟戶兵邀繼遷輜重于柳撥川殺
獲甚衆九月來攻破定州懷遠縣及堡靜永州清遠
軍監軍段義叛城遂陷五年三月繼遷大集蕃部攻
陷靈州以為西平府六年春遂都于靈州詔遣張崇
貴王涉議和割河西銀夏等五州與之六月復以二
萬騎圍麟州詔金明巡檢李繼周擊之圍未解麟州
部署請濟師真宗閱地圖曰麟州依險三面孤絕戮
力可守但城中乏水可憂耳乃遣兵走援繼遷果據
水砦薄城已五日知州衛居寶出奇兵突戰繼勇士

城下城上鼓噪矢石如注殺傷萬餘人繼遷乃拔去
遂率衆攻西蕃取西涼府都首領潘羅支偽降繼遷
受之不疑羅支遽集六谷蕃部及者龍族合擊之繼
遷大敗中流矢八月復聚兵浦洛河聲言攻環州詔
張凝等分兵以待之景德元年正月二日卒年四十
二子德明立祥符五年德明追上繼遷尊號曰應運
法天神智仁聖至道廣德孝光皇帝元昊追謚曰神
武廟號太祖墓號裕陵 德明小字阿移母曰順
成懿孝皇后野利市即位于柩前時年二十三邊臣
以德明初立乞詔撫之因賜詔令審圖去就又詔蕃

族萬山萬遇龐羅遊安萬子都虞候軍主吳守正馬
尾等能率部下歸順者授團練使銀萬兩絹萬匹錢
五萬緡茶五千斤其有亡命叛去者釋罪甄錄既而
康奴都移等率屬來降德明遣牙將王旻奉表歸順
賜旻錦袍銀帶遣侍禁夏居厚持詔荅之因詔河西
羌族各守疆場德明連歲表歸順三年復遣牙將仁
勛奉誓表請藏盟府且言父有遺命帝嘉之乃授特
進檢校太師兼侍中持節都督夏州諸軍事行夏州
刺史上柱國充定難軍節度夏銀綏宥靜等州管内
觀察處置押蕃落等使西平王食邑六千戶食實封

一千戶仍賜推忠保順亮節翊戴功臣遣內侍左右
班都知張崇貴太常博士趙湘等充旌節官告使賜
襲衣金帶銀鞍勒馬銀萬兩絹萬匹錢三萬貫茶二
萬斤給奉如內地因責子弟入質德明謂非先世故
事不遣乃獻御馬二十五匹散馬七百匹橐駝三百
頭謝恩四年又獻馬五百匹橐駝三百頭謝給奉廩
賜襲衣金帶器幣及請使至京市所需物從之五月
母罔氏薨除起復鎮軍大將軍右金吾衛上將軍員
外置同正員餘如故以殿中丞趙稹為弔贈兼起復
官告使德明以樂迎至樞前明日釋服涕泣對使者

自陳感恩及葬請脩供五臺山十寺乃遣閣門祗候
袁瑀為致祭使護送所供物至山復獻馬五百匹助
脩章穆皇后園陵大中祥符元年以天書降加賜守
正功臣益食邑一千戶食實封四百戶俄境內旱詔
權場勿禁西人市糧以振其乏東封又遣使來獻禮
成加兼中書令益食邑千戶實封四百戶時遼亦遣
使冊德明為大夏國王明年出侵回鶻恒星晝見德
明懼而還三年境內饑上表求粟百萬朝議不知所
出時王旦為相請敕有司具粟百萬于京師詔其來
取德明既得詔曰朝廷有人遂止大起宮室于鏃子

山會旱西攻河州甘州宗哥族及秦州緣邊熟戶遂
出大里河築柵蒼耳平四年祀汾陰進中書令五年
聖祖降加守太保七年二月謁太清宮遣使來獻方
物加宣德功臣八年築堡于石州濁輪谷將建椎場
詔緣邊安撫司止之九年因表邊臣違約招納逃亡
云自景德中進誓表朝廷亦降詔書應兩地逃民緣
邊雜戶不令停舍皆俾交還自茲謹守翰垣頗有倫
理自向敏中歸闕張崇貴云亡後來邊臣罕守舊制
各務邀功不虞生事遂致綏延等界涇原以來擅舉
兵甲入臣境土其有叛亡部族劫掠主財去者百無

十回臣之邊吏亦務蔽藏俱失奏論漸乖盟約詔答
已令鄰延涇原環慶麟府等路約束邊部毋相攻劫
其有隱蔽逃亡晝時勘送本國亦宜戒部下毋有藏
匿各遵紀律以守封疆五年德明追尊繼遷為太祖
應運法天神智仁聖至道廣德光孝皇帝廟號武宗
七年甘露降國中天禧元年正月加守太傅食邑千
戶實封四百戶三年春德明丁繼立母憂除起復如
前制以屯田員外郎上官佖為弔贈兼起復官告使
閣門祗候常希古為致祭使冬郊祀又加崇仁功臣
四年遼主親將兵五十萬以狩為言來攻涼旬德明

帥衆逆拒敗之五年遼復遣金吾衛上將軍蕭孝誠
賫玉冊金印冊為尚書令大夏國王乾興元年加純
誠功臣德明自歸順以來每歲旦聖節冬至皆遣牙
校來獻不絕而每加恩賜官告則又以襲衣五金荔
支帶金花銀匣副之銀沙鑼盆合千兩錦綵千匹金
塗銀鞍勒馬一匹副以纓復遣內臣就賜之又遣閣
門祇候賜冬服及頒儀天具注曆明年攻麟州柔遠
砦巡檢楊承吉與戰不利命曹瑋為環慶秦州緣邊
巡檢安撫使禦備之德明城懷遠鎮為興州以居仁
宗即位加尚書令德明娶三姓衛慕氏生元昊咩迷

氏生成遇訛藏屈懷氏生成鬼天聖六年德明遣子元昊攻甘州拔之八年瓜州王以千騎降于夏火星入南斗九年十月德明卒時年五十一追謚曰光聖皇帝廟號太宗墓號嘉陵宋贈太師尚書令兼中書令以尚書度支員外郎朱昌符為祭奠使六宅副使內侍省內侍押班馮仁俊副之賻絹七百匹布三百匹副以上醞羊米麩將葬賜物稱是皇太后所賜亦如之帝與皇太后成服于苑中子曩霄立曩霄本名元昊字嵬理國語謂惜為嵬富貴為理母曰惠慈敦愛皇后衛慕氏性椎毅多大畧善繪畫能剞製

物始圓面高準身長五尺餘少時好衣長袖緋衣冠
黑冠佩弓矢從衛步卒張青蓋出乘馬以二旗引百
餘騎自從曉浮圖學通蕃漢文字案上置法律常携
野戰歌太乙金鑑訣弱冠獨引兵襲破回鶻夜洛隔
可汗王奪甘州遂立為皇太子數諫其父母臣宋父
輒戒之曰吾久用兵疲矣吾族三十年衣錦綺此宋
恩也不可負元昊曰衣皮毛事畜牧蕃性所便英雄
之生當王霸耳何錦綺為德明卒即授特進檢校太
師兼侍中定難軍節度夏銀綏宥靜等州觀察處置
押蕃落使西平王以工部郎中楊吉為旌節官告使

禮賓副使朱允中副之既襲封明號令以兵法勸諸部始衣白窄衫檀冠紅裏冠頂後垂紅結綬自號鬼名吾祖凡六日九日則見官屬其官分文武班曰中書曰樞密曰三司曰御史臺曰開封府曰翊衛司曰官計司曰受納司曰農田司曰群牧司曰飛龍院曰磨勘司曰文思院曰蕃學曰漢學自中書令宰相樞使大夫侍中太尉已下皆分命蕃漢人為之文資則幘頭鞞笏紫衣緋衣武職則冠金帖起雲鏤冠銀帖間金鏤冠黑漆冠衣紫旋欄金塗銀束帶垂蹠躡佩解結錐短刀弓矢韉馬乘鯢皮鞍垂紅纓打跨鍍拂

便服則紫阜地繡盤毬子花旋襴束帶民庶青綠以別貴賤每舉兵必率部長與獵有獲則下馬環坐飲割鮮而食各問所見擇取其長初宋改元明道元昊避父諱稱顯道於國中景祐元年遂攻環慶路殺掠居人下詔約束之是歲改元開運踰月或告以石晉敗亡年號也乃改廣民元年毋衛慕氏死遣使來告哀起復鎮軍大將軍左金吾衛上將軍員外置同正員以內殿崇班閣門祗候王中庸為致祭使起居舍人郭勸為弔贈兼起復官告使慶州柔遠砦蕃部巡檢寇通攻破後橋諸堡於是元昊稱兵報仇緣邊都

巡檢楊遵柔遠皆監押盧訓以兵七百與戰于龍馬嶺敗績環慶路都監濟宗矩走馬承受趙德宣寧州都監王文援之次節義峯伏兵發執宗矩久之始放歸二年加兼中書令遣其令公蘇奴兒將兵二萬五千攻唃廝囉敗死畧盡蘇奴兒被執元昊自率衆攻猫牛城一月不下既而詐約和城開乃大縱殺戮又攻青唐安二宗哥帶星嶺諸城唃廝囉部將安子羅以兵絕歸路元昊晝夜角戰二百餘日子羅敗遂取瓜沙肅三州元昊既還欲南侵恐唃廝囉制其後復舉兵攻蘭州諸羌侵至馬銜山築城凡川元昊既悉

有夏銀綬宥靜靈鹽會勝甘涼瓜沙肅而洪定威龍
皆即堡鎮號州仍居興州阻河依賀蘭山為固始大
建官以鬼名守全張陔張絳楊廓徐敏宗張文顯輩
主謀議以鍾鼎臣典文書以成逋克成賞都卦移如
定多多馬竇惟吉主兵馬野利仁榮主蕃學置十二
監軍司委豪右分統其衆自河北至午臘葭山七萬
人以備契丹河南洪州白豹安鹽州羅落天都惟精
山等五萬人以備環慶鎮戎原州左廂宥州路五萬
人以備廊延麟府右廂甘州路三萬人以備西蕃回
紇賀蘭駐兵五萬靈州五萬人興州興慶府七萬人

為鎮守總五十餘萬而苦戰倚山訛山訛者橫山羌
平夏兵不及也選豪族善弓馬五千人迭直號六班
直月給米二石鐵騎三千分十部發兵以銀牌召部
長面受約束設十六司于興州以總庶務元昊自製
蕃書命野利仁榮演繹之成十二卷字形體方整類
八分而畫頗重複教國人紀事用蕃書而譯孝經爾
雅四言雜字為蕃語復改元大慶宋寶元元年表遣
使詣五臺山供佛寶欲窺河東道路與諸豪歃血約
先攻廊延欲自靖德塞門砦赤城路三道並入遂築
壇受冊即皇帝位時年三十遣潘七布昌里馬乞點

兵集蓬子山自詣西涼府祠神明年遣使上表曰臣
祖宗本出帝胄當東晉之末運創後魏之初基遠祖
思恭當唐季率兵拯難受封賜姓祖繼遷心知兵要
手握乾符大舉義旗悉降諸部臨河五郡不旋踵而
歸沿邊七州悉差肩而克父德明嗣奉世基勉從朝
命真王之號夙感于頒宣尺土之封顯蒙於割裂臣
偶以狂斐制小蕃文字改大漢衣冠衣冠既就文字
既行禮樂既張噐用既備吐蕃塔塔張掖交河莫不
從伏稱王則不喜朝帝則是從輻湊屢期山呼齊舉
伏願一域之土地建為萬乘之邦家于時再讓靡違

群集又迫事不得已顯而行之遂以十月十一日郊壇備禮為世祖始文本武興法建禮仁孝皇帝國稱大夏年號天授禮法延祚伏望皇帝陛下睿哲成人寬慈及物許以西郊之地冊為南面之君敢竭愚庸常敦歡好魚來鴈往任傳鄰國之音地久天長永鎮邊方之患至誠瀝懇仰俟帝俞謹遣弩涉俄疾你斯悶卧普令濟嵬崖妳奉表以聞詔削奪官爵互市揭榜于邊募人能擒元昊若斬首獻者即為定難軍節度使又遣賀永年齎娉書納旌節及所授敕告置神明匣留歸孃族而去康定元年環慶路鈐轄高繼隆

知慶州張崇俊攻後橋而柔遠砦主武英入自北門
拔之未幾夏人攻金明砦執都監李士彬父子破安
遠塞門永平諸砦圍延州設伏三川口執劉平石元
孫傅偃劉發石遜等又攻鎮戎軍敗劉繼宗李縉兵
五千環慶部署任福入白豹城焚其積聚破四十一
族慶曆元年二月攻渭州逼懷遠城韓琦徼巡邊至
高平盡發鎮戎兵及募勇士得萬人命行營總管任
福等併擊之都監桑懌為前鋒鈐轄朱觀都監武英
繼之福申令持重其父宿三川夏人已過懷遠東南
翌日諸軍躡其後西路巡檢常鼎劉肅與夏人對壘

于張家堡懾以騎兵趣之福分兵夕與懾為一軍屯
好水川川與能家川隔在隴山外觀英為一軍屯隴
洛川相離五里期以明日會兵不使夏人一騎遁然
已陷其伏中矣元昊自將精兵十萬營于川口候者
言夏人有些數不多兵益進詰旦福與懾循好水川
西去未至羊牧隆城五里與夏軍遇懾為先鋒見道
傍置數銀泥合封襲謹密中有動躍聲疑莫敢發福
至發之乃懸哨家鴿百餘自合中起盤飛軍上於是
夏兵四合懾先犯中軍繼之自辰至午酣戰陣中忽
樹鮑老旗長二丈餘懾等莫測既而鮑老揮右則右

伏出揮左則左伏出翼而襲之宋師大敗懾劉肅及福子
懷亮皆戰沒小校劉進勸福自拔福不聽力戰死初
渭川都監趙津將瓦亭塞騎兵千餘為諸將後繼是
日朱觀武英兵會家川與夏人遇陳合王珪自牟
牧隆城以屯兵四千五百人助觀略陣陣堅不可動
英重傷不能出軍戰自午至申夏軍益至東陣步兵
大潰衆遂奔珪英津及叅軍耿傳隊將李簡都監李
禹享劉均皆死於陣觀以千餘人保民垣發矢四射
會暮夏軍引去將校士卒死者萬三百人關右震動
軍須日廣三司告不足仁宗為之旰食宋庠請修潼

關以備衝突秋夏人轉攻河東及麟府不能下乃引
兵攻豐州城孤無援遂據之又破寧遠砦屯要害絕
麟府餉道揚偕始請棄河外保合河津帝不許會張
亢管勾麟府軍馬事破之于栢子又破之于兔毛川
亢築十餘柵河外始固元昊雖數勝然死亡創瘻者
相半人困於黠集財力不給國中為十不如之謠以
怨之元昊乃歸塞門砦主高延德因乞和知延州范
仲淹為書陳禍福以喻之元昊使其親信野利旺榮
復書誑猶媢知延州龐籍言夏境鼠食稼且旱元昊
思納款遂令知保安軍劉拯諭旺榮言公方持靈夏

兵倘內附當以西平茅土分冊之知青澗城种世衡
又遣王嵩以棗及畫龜為書置蠟丸中遺旺榮諭以
早歸之意欲元昊得之疑旺榮旺榮得之笑曰种使
君亦長矣何為此兒戲耶囚嵩寗吊歲餘知渭州王
沿總管葛懷敏使僧法淳持書徃而旺榮乃出嵩與
教練使李文貴至青澗城自言用兵以來資用困乏
人情便於和籍疑其款吾軍留之數月二年復大入
戰于定州宋師大敗葛懷敏死之直抵渭川大焚掠
而去詔籍招納籍遣文貴還月餘元昊使文貴與王
嵩以其臣榮旺其弟旺令嵬名瓌卧譽諱三人書議

和然屈彊不肯削僭號且云如日方中止可順天西
行安可逆天東下籍以其言未服乃令自請而詔籍
復書許之明年遣六宅使伊州刺史賀從勗與文貴
俱來猶稱男邦泥定國兀卒上書父大宋皇帝更名
曩霄而不稱臣兀卒即吾祖也如可汗號議者以為
改吾祖為兀卒特以侮玩朝廷不可許詔遣邵良佐
張士元張子奭王正倫更往議且許封冊為夏國主
而元昊亦遣如定聿捨張延壽楊守素繼來四年始
上誓表言兩失和好遂歷七年立誓自今願藏盟府
其前日所掠將校民戶各不復還自此有邊人逃亡

亦毋得襲逐臣近以本國城砦進納朝廷其拷棹鎌
刀南安承平故地及他邊境蕃漢所居乞畫中為界
於內聽築城堡凡歲賜銀綺絹茶二十五萬五千乞
如常數臣不復以他相干乞頒誓詔蓋欲世世遵守
永以為好倘君親之義不存或臣子之心渝變使宗
祀不永子孫罹殃詔荅曰朕臨制四海廓地萬里西
夏之土世以為胙今乃納忠悔咎表於信誓質之日
月要之鬼神及諸子孫無有渝變申復懇至朕甚嘉
之俯閱來誓一皆如約十二月遣尚書祠部員外郎
張子頤充冊禮使東頭供奉官閣門祗候張士元副

之仍賜對衣黃金帶銀鞍勒馬銀二萬兩絹二萬匹
茶三萬斤冊以漆書竹簡籍以天下樂錦金塗銀印
方二寸一分文曰夏國主印錦綬塗金銀牌緣冊法
物皆銀裝金塗覆以紫繡約稱臣奉正朔改所賜敕
書為詔而不名許自置官屬使至京就驛實實宴坐
朶斃使至其國相見用賓客禮置榷場于保安軍及
高平砦第不通青鹽然宋每遣使往館于宥州終不
復至興靈而元昊帝其國中自若也是歲遼夾山部
落朶兒族八百戶歸元昊興宗責還元昊不遣遂親
將騎兵十萬出金蕭城弟天齊王馬步軍大元帥將

騎七千出南路韓國王將兵六萬出北路三路濟河
長驅與宗入夏境四百里不見敵據得勝寺南壁以
待八月五日韓國王自賀蘭北與元昊接戰數勝之
遼兵至者日益夏乃請和退十里韓國王不從如是
退者三凡百餘里矣每退必赭其地遼馬無所食因
許和夏乃遷延以老其師而遼之馬益病因急攻之
遂敗復攻南壁與宗大敗入南樞王蕭孝友皆擒其
鶻突姑附馬與宗從數騎走元昊縱其去元昊五月
五日生國入以其日相慶賀又以四孟朔為節凡五
娶一曰大遼興平公主二曰宣穆惠文皇后沒藏氏

生諒祚三曰憲成皇后野力氏四曰妃沒咻氏五曰
 索氏元昊以慶曆八年正月殂年四十六在位十七
 年改元開運一年廣運二年大慶二年天授禮法延
 祚十一年謚曰武烈皇帝廟號景宗墓號泰陵宋遣
 開封府判官尚書祠部員外郎曹穎叔為祭奠使六
 宅使達州刺史鄧保信為弔慰使賜絹一千匹布五
 百端羊百口麩米各百石酒百瓶及葬仍賜絹一千
 五百匹餘如初賻子諒祚立

諒祚景宗長子也

小字窳令哥國語謂歡嘉為窳令兩岔河名也母曰
 宣穆惠文皇后沒截氏從元昊出獵至此而生諒祚

遂名焉以慶曆七年丁亥二月六日生八年戊子正月方期歲即位四月遣尚書刑部員外郎任顓充用禮使供備庫副使宋守約充副使冊諒祚為夏國主嘉祐元年母沒藏氏薨遣祖儒嵬多聿則慶唐及徐彞卿來告哀詔以集賢校理馮浩假尚書刑部郎中直史館為弔慰使文思副使張惟清假文思使副之乃獻遺留馬駝以謝諒祚幼養于母族訛龐訛龐因專國政初麟州西城枕睥睨曰紅樓下瞰屈野河其外距夏境尚七十里而田腴利厚多入訛龐歲東侵不已至耕獲時輒屯兵河西經畧使龐籍每戒邊將

使毋得過屈野河然所距屈野河猶二十里管勾軍馬司賈逵徼循見所侵田稍過督邊吏麟州守王亮懼始以事聞詔以殿直張安世賈恩為同巡檢經制之訛龐晏然弗革迫之則格鬪緩之則歸耕經畧司遣使還所侵田訛龐專為譟言無歸意嘉祐二年遂圍兵宿境上逮三月增至數萬人守將斂兵弗與戰知麟州武戡築堡于河西以為保障後既興戡率將吏往按視遇夏人于沙鼠浪戡與管勾郭恩等欲止而走馬承受黃道元以言脅之遂夜進至卧牛峯見烽舉且鼓聲道元猶不信比明至忽里堆與夏人相

去纔數十步遂合戰自旦至食時夏人四面合擊衆
大潰散走恩與道元及兵馬監押劉慶等被執安撫
司遣李思道孫兆往議壇事而訛龐鰲不聽久之太
原府代州兵馬鈐轄蘇安靜得夏國呂寧拽浪撩黎
來合議乃築堦九更新邊禁要以違約則罷和市自
此始定諒祚忌訛龐專或告訛龐將叛諒祚討殺之
夷其族已而請去蕃禮從漢儀嘉祐六年上書自言
慕中國衣冠明年當以此迎使者詔許之明年又改
西壽監軍司為保泰軍石州監軍司為靜塞軍韋州
監軍司為祥祐軍左廂監軍司為神勇軍遣人獻方

物稱宣徽南院使詔諭非陪臣所宜稱戒其僭擬使
遵誓詔表求太宗御製草詩隸書石本且進馬五十
匹求九經唐史冊府元龜及宋正至朝賀儀詔賜九
經還所獻馬治平初求復榷場不許既而遣吳宗等
來賀英宗即位詔令門見使者不從至順天門且欲
佩魚及儀物自從引伴高宜禁之不可留止廐置一
夕絕其供饋宗語不遜宜折之使如故事良久乃聽
入及賜食殿門又訴於押伴張觀詔命還赴延州與
宜辨宗度理屈不復置對遂詔諒祚懲約之秋夏人
出兵秦鳳涇原抄熟戶擾邊塞弓箭手殺掠人畜以

萬計程戡王素繇長卿諭安諸族首領防誘脇散叛
遣文思副使王無忌齎詔問之諒祚遷延弗受已而
因賀正使荔茂先獻表歸罪宋邊吏三年遂大舉攻
大順城分兵圍柔遠砦燒屈乞村柵段木嶺州兵熟
戶蕃官趙明合擊退之遣西京左藏庫副使何次公
詰之三月乃獻方物謝罪賜絹五百匹銀五百兩神
宗即位乃遣內殿崇班魏瑛賜以治平三年冬服銀
絹供備庫副使高遵裕告哀并以英宗遺留物賜之
秋夏國遣使奉慰及進助山陵冬种諤取綏州因發
兵夜掩蒐名山帳脇降之諒祚乃詐為會議誘知保

三百二十四
安軍楊定都巡檢侍其臻等殺之邊吏以聞命韓琦
知永興軍經畧西方諒祚錮送殺定者六宅使李崇
貴右侍禁韓道善及虜去定子仲通十二月諒祚殂
年二十一在位二十年改元延嗣寧國一年天祐垂
聖三年福聖承道四年韞都六年拱化五年謚曰昭
英皇帝廟號毅宗墓號安陵子秉常立

列傳卷第二百四十四

列傳卷第二百四十五 宋史四百八十六

開儀圖三上 侍國錄國事 前書丞相 樞密 領經筵事 都總 脫 奉

勅

外國二

夏國下

秉常毅宗之長子母曰恭肅章憲皇后梁氏治平四年冬即位時年七歲梁太后攝政熙寧元年三月遣新河北轉運使刑部郎中薛宗道等來告哀神宗問殺楊定事宗道言殺人者先已執送之矣乃賜詔慰之并諭令上大首領數人姓名當爵祿之俟崇貴至

即行冊禮及崇貴至云定奉使諒祚常拜稱臣且許以歸沿邊熟戶諒祚遺之寶劍寶鑑及金銀物初定之歸上其劍鑑而匿其金銀言諒祚可刺帝喜遂擢知保安既而夏人失綏州以為定賣已故殺之至是事露帝薄崇貴等罪而削定官沒其田宅萬計二年二月遣河南監牧使劉航等冊秉常為夏國主三月夏人入秦州陷劉溝堡殺范愿既而進誓表乞班誓詔及請以安遠塞門二砦易綏州初朝議欲官爵夏之首領計分其勢郭逵以為彼必不受詔且彼既恭順宣布以大信不當誘之以利秉常果不奉詔遣都

羅重進來言曰上方以孝治天下柰何反教小國之臣叛其君哉於是前議遂罷乃賜誓詔而綏州待得二砦廼還夏主受冊而二砦不歸且欲先得綏州遣罔萌訛以誓詔來言及趙高往交地萌訛對以朝廷本欲得二砦地界非所約高曰若然塞門二墻墟耳安用之遂罷詔城綏州八月表請去漢儀復用蕃禮從之十月遣使來謝封冊三年五月夏人號十萬築開訛堡知慶州李復圭合蕃漢兵纔三千偏遣偏將李信劉甫种詠等出戰信等訴以衆寡不敵復圭威以節制親畫陣圖方畧授之兵進遂大敗復圭懼欲

自解助執信等而取其圖畧命州官李昭用劾以故
違節制詠瘦死獄中斬信甫配流郭貴復出兵邛州
堡夜入欄浪市掠老幼數百又襲金湯而夏人已去
惟殺其老幼一二百人以功告捷而邊怨大起矣八
月夏人遂大舉入環慶攻大順城柔遠砦荔原堡淮
安鎮東谷西谷二砦業樂鎮兵多者號二十萬少者
不下一二萬屯榆林距慶州四十里游騎至城下九
日乃退鈴轄郭慶高敏魏慶宗秦勃等死之四年正
月种諤謀取橫山領兵先城羅兀進築永樂川賞逋
嶺二砦分遣都監趙璞燕達築撫寧故城及分荒堆

三泉吐渾川開光嶺葭蘆川四砦與河東路脩築各
相去四十餘里二月夏人來攻順寧砦復圍撫寧折
繼昌高永能等擁兵駐細浮圖去撫寧咫尺囉兀兵
勢尚完种諤在綏德節制諸軍聞夏人至茫然失措
欲作書召燕達戰怖不能下筆顧轉運判官李南公
涕泗不已於是新築諸堡悉陷將士千餘人皆沒初
朝議以諤新築囉兀城去綏德百餘里偏梁險狹難
於餽餉且城中無井泉遣李評張景憲往視之未至而
撫寧陷遂詔棄囉兀城五月燕達以戍卒輜重歸自
囉兀為夏人邀擊達多失亡九月夏遣使入貢且以

二若易綏州乞如舊約詔不允五年正月夏鈐轄結勝為麟州步將王文郁戰降授供奉官久之謀竄歸事覺詔聽其去六月夏人還荔原堡逃背熟戶鬼通等七十八人閏七月遣部將景思立王存以涇原兵出南路王韶由東谷徑趨武勝未至十餘里逢夏人戰遂至其城瞻樂棄城夜遁大首領曲撒四王阿南珂出奔乃城武勝十二月遣使進馬贖大藏經詔賜之而還其馬八年三月夏人以索蕃漢部盜人畜投南界者牒熙河經畧司請高太尉赴三岔堡會議牒稱大安二年乃詔鄜延經畧司令牒宥州問妄稱年

號且牒非其地分邊臣會議皆違越生事是必夏主
不知請問之夏人進奉山陵後期詔令先至永厚陵
設祭後至闕奉慰帝謂輔臣曰元昊昔僭號遣使上
表稱臣其辭猶遜朝廷不先詰其所以然而遽絕之
縱邊民蕃部討虜故元昊嘗自謂為諸羌所立不得
辭朝廷不得命不得已而變西師亟戰輒敗天下騷
然仁宗悔之當元昊僭書來獨諫官吳育謂難以中
國叛臣處之或可稍易以名號議者皆以為不然卒
困中原而後歲賜封冊為夏國主良可惜哉元豐二
年六月夏人自滿堂川入大會平殺防田人馬兵官

李浦等逼逐出塞九月綏德把截楊永慶聲徼循邊而掩取蕃部首級詐言斬犯邊人詔毀永慶出身文字送西京編管四年四月有李將軍清者本秦人說秉常以河南地歸宋國母知之遂誅清而奪秉常政鄜延總管种諤乃疏秉常遇弑國內亂宜興師問罪此千載一時之會帝然之遂遣王中正往鄜延環慶稱詔募禁兵從者將之詔熙河李憲等以秉常見囚大舉征夏及詔諭夏國嵬名諸部首領能拔身自歸及相率共誅國讐當崇其爵賞敢有違拒者誅九族八月中正及諤言涇原環慶會兵取靈州復討興州

麟府廊延先會夏州取懷州渡會興州憲總七軍及
董種兵三萬至新市城遇夏人戰敗之王中正出麟
州禡辞自言皇帝親征提兵六萬才行數里即奏已
入夏境屯白草平九日不進環慶經畧使高遵裕將
步騎八萬七千涇原總管劉昌祚將卒五萬出慶州
諤將廊延及畿內兵九萬三千出綏德城九月諤圍
米脂夏人來救戰于無定川大破之斬首五千級十
月遂克米脂降守將令分訛遇進攻石州中正以河
東軍度無定河循水北行地皆沙濕士馬多陷沒遂
繼諤趨夏川而民皆潰軍無所得遵裕至清遠軍攻

靈州夏人決黃河灌營復抄絕餉道士卒凍溺死餘
兵纔萬三千人遂歸夏人追戰將官俞平死之中正
至宥州奈王井糧盡士卒死亡者已二萬乃引軍還
諤兵無食會大雪死遂潰入塞者纔三萬人昌祚遇
夏人于磨臍隘夏之拒者二三萬人昌祚乃分兵渡
葫蘆河奪其隘與統軍國母弟梁大王戰遂大破之
憲營于天都山下焚夏之南牟內殿并其館庫追襲
其統軍仁多咬丁敗之擒百人遂班師涇原總兵侍
禁魯福彭孫護餽餉至鳴沙川與夏人三戰敗績初
夏人聞宋大舉梁太后問策于廷諸將少者盡請戰

一老將獨曰不須拒之但堅壁清野縱其深入聚斂
兵于靈夏而遣輕騎抄絕其餽運大兵無食可不戰
而困也梁后從之宋師卒無功五年正月遼使涿州
遣書云夏國來稱宋兵起無名不測事端神宗報以
夏國主受宋封爵昨邊臣言秉常見為母黨囚辱比
令移問事端其同惡不報繼又引兵數萬侵犯我邊
界義當有征今彼以屢遭敗衄故遣使詭情陳露意
在間貳想彼必以悉察夏人聞此遂不至五月沈括
請城古烏延城以包橫山使夏人不得絕沙漠遂遣
侍中徐禧內侍押班李舜舉往議禧復請于銀夏宥

之界築永樂城永樂依山無水泉獨種誇極言不可
禧率諸將竟城之賜名銀川峇禧等還米脂以兵萬
人屬曲珍守之永樂接宥州附橫山夏人必爭之地
禧等既城去九日夏人來攻珍使報禧乃挾李舜舉
來援而夏兵至者號三十萬禧登城西望不見其際
宋軍始懼翌日夏兵漸逼禧乃以七萬陣城下坐譙
門執黃旗令衆曰視吾旗進止夏人縱鐵騎渡河或
曰此號鐵鷄子當其半濟擊之乃可有逞得地則其
鋒不可當也禧不聽鐵騎既濟震盪衝突大兵從之
禧師敗績將校寇倖李思古高世才夏儼程博古及

使臣十餘輩士卒八百餘人盡沒詔李憲張世矩往
援及令括遣人與約退軍當還永樂地夏人進侵及
縣門潰歸城者決水砦為道以登夏人因之奔歸于
城者三萬人皆沒夏兵圍之者厚數里遊騎掠米脂
將士晝夜血戰城中之水已數日斲井不得泉渴死
者大半括等援兵及餽運皆為夏大兵所隔夏人呼
玠來講和呂整景思義相繼而行夏人斃思義囚之
而城圍者已浹旬矣夜半夏兵環城急攻城遂陷高
永能戰沒禧舜舉運使李穆皆死於亂兵惟曲珍王
湛李浦呂整裸跣走免蕃部指揮馬貴獨誓死持刀

四百个
殺數十人而沒是役也死者將校數百人士卒役夫
二十餘萬夏人乃耀兵米脂城下而還宋自熙寧用
兵以來凡得葭蘆吳保義合米脂浮圖寒門六堡而
靈州永樂之役官軍熟羌義保死者六十萬人錢粟
銀絹以萬數者不可勝計帝臨朝痛悼而夏人亦困
弊夏西南都統昴星嵬名濟廼移書劉昌祚曰中國
者禮樂之所存恩信之所出動止猷為必適于正若
乃聽誣受間肆詐窮兵侵人之土疆殘人之黎庶是
乖中國之體為外邦之羞昨者朝廷暴興甲兵大窮
侵討蓋天子與邊臣之議為夏國方守先誓宜出不

虞五路進兵一舉可定故去年有靈州之役今秋有
未樂之戰然較其勝負與前日之議為何如哉朝廷
於夏國非不經營之五路進討之策諸邊肆統之謀
皆嘗用之矣知徽幸之無成故終於樂天事小之道
况夏國提封一萬里帶甲數十萬南有于闐作我歡
隣北有大燕為我強援若乘間伺便角力競鬪雖十
年豈得休哉即念天民無辜受此塗炭之苦國主自
見伐之後夙夜思念為自祖宗之世事中國之禮無
或虧貢聘不敢怠而邊吏幸功上聰致感祖宗之盟
既阻君臣之分不交存亡之機發不旋踵朝廷豈不

恤哉至於魯國之憂不在顯史隋室之變生於楊感
此皆明公得於胸中不待言而後喻今天下倒垂之
聖正在英才何不進讜言闢邪議使朝廷與夏國歡
好如初主良重見太平豈獨夏國之幸乃天下之幸
也昌祚上其書帝喻答之六年二月夏人大舉圍蘭州
已奪兩關門鈐轄王文郁集死士七百夜縋城而下
持短兵突營遂拔去五月復來圍九日大戰侍禁韋
禁死之乃解去閏六月遣使謨箇咩迷乞遇來貢表
曰夏國累得西蕃征王子書稱南朝與夏國交戰歲
久生靈荼毒欲擬通和緣夏國先曾請所侵疆土不

從以來未便輕許西蕃再遣使散八昌郡丹星等
到國稱南朝語言計會但當遣使齎表自令引赴南
朝切念臣自歷世以來貢奉朝廷無所虧怠至於近
歲尤甚歡和不意儉人誣間朝廷特起大兵侵奪疆
土城砦因茲構怨歲致交兵今乞朝廷示以大義特
還所侵倘垂開納別效忠勤乃賜詔曰頃以權強敢
行廢辱朕用震驚令邊臣往問匿而不報王師徂征
蓋討有罪今遣使造庭辭禮恭順仍聞國政悉復故
常益用嘉納已戒邊吏毋輒出兵尔亦其守先盟遂
詔陝西河東經畧司其新復城砦徼循毋出三二里

夏之歲賜如舊七年正月圍蘭州李憲戰却之六月
攻德順軍巡檢王友戰死九月圍定西城燒龕谷族
帳遂以十月至靜邊鈐轄彭孫敗之殺其首領仁多
凌丁十二月攻清遠隊將白玉李貴死之八年三月
柙宗崩賜以遺留物夏人攻葭蘆供奉王英戰死七
月遣使丁拏嵬名謨鐸副使呂則陳聿精等來奠慰
十月遣芭良嵬名濟賴昇聶張聿正進助山陵禮物
夏國主母梁氏薨訃至以朝散郎刑部郎中杜紘充
祭奠使東頭供奉官閤門祗候王有言充弔慰使夏
以主母遺留物來進元祐元年二月始遣使入貢五

月遣鼎利罔豫章來賀哲宗即位六月復遣訛囉聿
來求所侵蘭州米脂等五砦使未至蘇轍兩疏請因
其請地而與之司馬光言此邊鄙安危之機不可不
察靈夏之役本由我起新開數砦皆是彼田今既許
其內附豈宜靳而不與彼必曰新天子即位我卑辭
厚禮以事中國庶幾歸我侵疆今猶不許則是恭順
無益不若以武力取之小則上書悖慢大則攻陷新
城當此之時不得已而與之其為國家之恥無乃甚
於今日乎群臣猶有見小忘大守近遺遠惜此無用
之地使兵連不解為國家之憂願決聖心為兆民計

時異議者衆唯文彥博與光合遂從之秋七月乙丑
秉常歿時年三十六在位二十年改元乾道二年天
賜禮盛國慶五年大安十一年天安禮定一年謚曰
康靖皇帝廟號惠宗墓號獻陵子乾順立 乾順

惠宗之長子也母曰昭簡文穆皇后梁氏生三歲即
位元祐元年十月以父歿遣使呂則罔聿謨等來告
哀詔自元豐四年用兵所得城砦待歸我陷執民當
畫以給還乃遣金部員外郎穆衍充祭奠使供備庫
使張楙充弔慰使夏遣使進馬駝來賀龍興節二年
正月遣權樞密院都承旨公事劉奉世為冊禮使崇

儀副使崔象先副之冊乾順為夏國主仍節度西平
王三月夏遣大使映吳寇名諭密副使廣樂毛示聿
等詣太皇太后進駝馬以謝奠慰七月夏人攻鎮戎
軍諸堡劉昌祚等禦之而退三年三月攻德靖砦諸
將米贊郝普戰死詔劉昌祚以涇原萬人駐德順軍
熙河五千人駐通遠軍據秦鳳要害以為掎角夏人
遂攻龕谷砦砦兵及東關堡巡檢等戰不利死者幾
百人四年二月始遣使謝封冊六月稍歸永樂所獲
人遂以葭蘆米脂浮圖安疆四砦與之而書界未定
遣崇儀使董正叟如京使李玩押賜夏國生日禮物

及冬服七月坤成節十二月興龍節皆遣使來賀五年六月夏人來言畫疆界者不依綏州內十里築堡鋪供耕牧外十里立封堆作空地例以辨兩國界詔曰已諭邊臣如約夏之封界當亦體此冬攻蘭州之質孤勝如堡既而遣使來賀正旦六年七月遣使來賀坤成節九月圍麟府三日殺掠不計鄜延都監李儀等盡沒七年屢攻綏德城以重兵壓涇原境留五旬大掠築壘于沒烟峽口以自固游師雄請自蘭州李諾平東抵通遠定西通渭之間建汝遮納迷結珠龍三砦及置護耕七堡以固藩籬穆衍請於質孤勝

如二堡之間城李諾平以控要害議未決秦鳳都監
康謂以為夏之所以未臣附而屢肆兵者以我勢分
於隄備兵未練而賞罰失當耳若擇銳結伍伺彼之
動聚則先擊散則復襲則彼分而我聚以衆擊寡可
得志也詔謂詣闕而下其事於諸道八年四月復遣
使以蘭州一境易塞門二砦詔數其違順不常而却
其請紹聖元年二月夏進馬助太皇太后山陵復遣
使再議易地詔不允三年九月大入鄜延西自順寧
招安砦東自黑水安定中自塞門龍安金明以南二
百里間相繼不絕至延州北五里十月忽自長城一

四百一十一
日馳至金明列營環城國主子母親督桴鼓縱騎四
掠知麟州有備復還金明而後騎之精銳者留龍安
邊將悉兵掩擊不退金明乃破守兵二千八百人惟
五人得脫城中糧五萬石草千萬束皆盡將官皇城
使張俞死之既還留一書置漢人頸上曰貸汝命為
我投於經畧使處其言曰夏國昨與朝廷議疆場惟
有小不同方行理究不意朝廷改悔却於坐團鋪處
立界本國以恭順之故亦黽勉聽從遂於境內立數
堡以護耕而廊延出兵悉行平蕩又數數入界殺掠
國人共憤欲取延州終以恭順止取金明一砦以示

兵鋒亦不失臣子之節也延帥呂惠卿上于樞密院而不以聞初哲宗聞夏人來寇泰然笑曰五十萬衆深入吾境不過十日勝不過一二砦湏去已而果破金明引退四年正月涇原都鈐轄王文振率諸將破沒煙峽新砦斬獲三千餘級二月夏復以七萬衆攻綏德廊延將兵戰退之元符元年十二月涇原折可適掩夏西壽統軍嵬名阿埋監軍妹勒都逋獲之彗星見乾順赦國中二年正月國母梁氏薨遼遣使蕭德崇來為夏入議和乃復書謂若果出至誠深悔謝罪當徐度所宜開以自新之路五月夏蘭會正鈐轄

革瓦孃以部落來降授內殿崇班賜銀絹緡錢各三百七月環州種朴徼赤羊川獲賞囉訛乞家屬百五十餘口孳畜五千夏人千餘騎來追戰却之擒監軍訛勃囉及首領淚丁訛遇詔令赴闕存恤訛乞家屬又遣人持其家信號往招之九月夏人來告國母哀因上表謝過詔夏主省所上表能抗章引慝已諭邊臣我疆彼界毋相侵犯已而夏以二千騎出浮圖岔來戰供奉官陳告差使李戴死之閏九月古邈川部族叛熙河將王愨率兵掩擊翌日夏人馬數萬圍愨等力戰敗之擒其鈐轄嵬名乞遇統制苗履又戰於

青唐峽夏人敗績十二月遂遣令能鬼名濟等進誓
表曰臣國久不幸時多遇凶兩經母黨之擅權累為
奸臣之竊命頻生邊患增怒上心釁端既深理訴難
達幸凶黨伏誅稚躬反正避馳懇奏陳前咎之所歸
乞紹先盟果淵衷之俯納故班詔而申諭獲貢誓以
輸誠謹當飭疆吏而永絕爭端戒國人而常遵聖化
違約則凶咎再降背盟則基緒非延約束事條恭依
處分詔報曰尔以凶黨造謀數干邊吏而能悔過請
命祈紹先盟念彼種人均吾赤子措之安靜乃副朕
心嘉尔自新俯從厥志尔無爽約朕不食言自今已

往歲賜仍舊三年正月哲宗崩徽宗即位九月夏遣使來奠慰及賀即位十月復遣使來賀天寧節建中靖國元年乾順始建國學設弟子員三百立養賢務以廩食之崇寧三年蔡京秉政使熙河王厚招夏國卓羅右廂監軍仁多保忠厚云保忠雖有歸意而下無附者章數上不聽京愈責厚急乃遣弟詣保忠許還為夏之邏者所獲遂追保忠赴牙帳厚以保忠縱不為所殺亦不能復領軍政使得之一匹夫耳何益於事京怒必令金帛招致之夏乃點兵延渭慶三路各數千騎出沒聲言假兵于遼矣三年遼以成安公

主嫁乾順四年詔西邊能招致者毋問首從賞同斬
級令用京計也陶節夫在延州大加招誘乾順遣使
異請皆拒之又令殺其牧放者夏人遂入鎮戎畧數
萬口執知廓州高永年而去又攻湟州自是兵連者
三年大觀元年始遣人脩貢政和四年冬環州定遠
大首領夏人李訛哆以書遺其國統軍梁哆陵曰我
居漢二十年每見春廩既虛秋庾未積糧草轉輸例
給空券方春未秋士有饑色若捲甲而趨徑擣定遠
唾手可取定遠既得則旁十餘城不攻而下矣我儲
穀累歲闕地而藏之所在如是大兵之來斗糧無齎

可坐而飽也。哆陵遂以萬人來迎，轉運使任諒先知其謀，募民盡發窖穀，哆陵圍定邊，失所藏，越七日訛哆遂以其部萬餘歸。夏乾順築城底河，城遂詔河東節度使童貫為陝西經畧以討之。五年春，遣熙河經畧劉法將步騎十五萬出湟州，秦鳳經畧劉仲武將兵五萬出會州，貫以中軍駐蘭州，為兩路聲援。仲武至清水河，築城屯守，而還。法與夏人右廂軍戰於古骨龍，大敗之，斬首三千級。貫奏凱，皆遷秩。秋，仲武王厚復合涇原、鄜延、環慶、秦鳳之師，攻夏城底河，城敗。績死者十四五。秦鳳第三將全軍萬人皆沒，厚懼，厚

賂貫而匿之冬夏人以數萬騎畧蕭關而去六年春
劉法劉仲武合熙秦之師十萬攻夏仁多泉城三日
不克援後期不至城中請降法受其降而屠之獲首
三千級种師道以十萬衆復攻臧底河城克之十一
月夏人大舉攻涇原靖夏城時久無雪夏先使數萬
騎繞城踐塵漲天兵對不覩乃潛穿壕為地道入城
中城遂陷復屠之而去宣和元年童貫復逼劉法使
取朔方法不得已引兵二萬出至統安城遇夏國主
弟察哥郎君率步騎為三陣以當法前軍而別遣精
騎登山出其後大戰移七時前軍楊惟忠敗入中軍

後軍焦安節敗入左軍朱定國力戰自朝及暮兵不食而馬亦渴死多法乘夜遁比明走七十里至盍朱峻守兵見追之墜崖折足為一別瞻軍斬首而去是役死者十萬貫隱其敗而以捷聞察哥見法首惻然語其下曰劉將軍前敗我於古骨龍仁多泉吾常避其鋒謂天生神將豈料今為一小卒梟首哉其失在恃勝輕出不可不戒遂乘勝圍震武劉仲武何瓊等赴之乃解去震武在山峽中熙秦兩路不能餉自築三歲間知軍李明孟清皆為夏人所殺初夏人陷法軍圍震武欲拔之察哥曰勿破此城留作南朝病塊

乃自引去而宣撫司受解圍之賞者數百人實自去之也諸路所築城砦皆不毛夏所不爭之地而關輔為之蕭條果如察哥之言十月夏遣使來賀天寧節授以誓詔不取貴不能屈但迫館伴強之使持還及邊遂棄之而去賈炎得而上之貫始大沮欽宗即位遣使來賀正旦先是金人滅遼黏罕遣撒拇使夏國許割天德雲內金肅河清四軍及武州等八館之地約攻麟州以牽河東之勢靖康元年三月夏人遂由金肅河清渡河取天德雲內武州河東八館之地四月陷震威城兵馬監押朱昭死之繼而金貴人兀室

以數萬騎陽為出獵掩至天德逼逐夏人悉奪有其地夏人請和金人執其使歲丁未乾德改元正德時建炎元年也是歲九月金帥兀朮回雲中遣保靜軍節度使楊天吉約侵宋乾順許之十月通問使傅雱見金左監軍希尹于雲中希尹以國書授雱為夏國請熙寧以來侵地蓋彼既奪其地乃責償于宋以報之二年正月以主客員外郎謝亮為陝西撫諭使兼宣諭使從事郎何洋為太學博士持詔書賜乾順亮西入關廊延經畧使王庶遺亮書曰大夫出疆有可以安社稷利國家者專之可也夏國為患小而緩

金人為患大而急方其挫銳熙河奔北郿延秋稼未
登兵士困餓閭下苟能仗節督諸路協同義舉雖未
足盡雪舊恥亦可驅逐渡河全秦奠枕徐圖恢復矣
亮不能用遂由環慶入西夏慶曆後夏國主嘗以賓
禮見使者亮至乾順乃倨然見之留居幾月始與約
和罷兵亮歸而夏之兵已躡其後襲取定邊軍明年
亮還行在二月金帥婁宿連陷長安鳳翔隴右大震
夏人謀知關陝無備遂檄延安府言大金割郿延以
隸本國須當理索敢違拒者發兵誅討之帥臣王庶
檄報曰金人初犯本朝嘗以金肅河清界尔今誰與

守國家以奸臣貪得不恤鄰好遂至于此貪利之臣何國無之豈意夏國躬蹈覆轍比聞金人欲自涇原徑擣興靈方切寒心不圖尚欲乘人之急幕府雖士卒單寡然類皆節制之師左支右吾尚堪一戰果能辦此何用多言因遣諜間其用事臣李遇夏人竟不出是歲開封尹宗澤奏疏請北伐且言乞遣辯士西說夏國東說高麗俾出助兵三年知樞密院事張浚使川陝謀北伐欲通夏國為援奏請國書詔從之七月浚西行復以主客員外郎謝亮假太常卿權宣府處置司叅議官再使夏國四年正月浚遣亮往迄不

得其要領而還十月環慶路統制慕洵叛降于夏國
紹興元年二月同州觀察副使劉惟輔棄德順軍輸
款于夏夏人拒不受八月詔以夏本敵國毋復班曆
日十一月川陝宣撫副使吳玠始遣人通夏國書二
年九月呂頤浩言聞金夏交惡夏國屢遣人來吳玠
關師古軍中宜令張浚通問以揮其情是歲餘覩謀
結燕雲之人圖女直黏罕覺欲誅之餘覩父子遁入
夏國夏人以其兵少不納四年十二月吳玠奏夏國
數通書有不忘本朝意五年乾順改元大德七年正
月吳璘奏西蕃三十八族首領趙繼忠來歸用可拒

西夏右臂十月偽齊知同州李世輔謀執金帥撒里曷歸宋不克遂奔夏世輔父母親族在延安者金人殺之無遺類九年夏人陷府州靈芝生於後堂高守忠家乾順作靈芝歌俾中書相王仁宗和之乾順以世輔為靜難軍承宣使廊延岐雍等路經畧安撫使世輔請兵將報延安之役夏主俾先討別種酋豪號青面夜叉者世輔擒之以報乾順乃為出兵遣文臣王樞武臣叟訛等隨之世輔軍至延安撒里曷走耀州世輔購得害其父母者殺之東城聞金人降赦歸宋河南地乃說王樞等降宋叟訛不從世輔抽刀斫之

不中遂縛樞命王晞韓護送行在五月丙午世輔以其衆三千人歸宋授世輔護國承宣使樞密行府前軍都統制賜名顯忠六月四日乾順殂年五十七在位五十四年改元天儀治平四年天祐民安八年永安三年貞觀十三年雍寧五年元德八年正德八年大德五年謚曰聖文皇帝廟號崇宗墓號顯陵子仁孝嗣 仁孝崇宗長子也紹興九年六月崇宗殂即位時年十六十月詔還王樞及夏國之俘百九十八人十一月仁孝尊其母曹氏為國母十二月納后周氏十年夏廢元大慶三月詔胡世將與夏人議入貢

夏人不報十一年六月夏樞密使慕洎弟慕濬謀反
伏誅仁孝上尊號曰制義去邪十一年九月夏國饑
十三年三月地震逾月不止地裂泉湧出黑沙歲大
饑乃立井里以分振之十三年夏改元人慶始建學
校于國中立小學于禁中親為訓導十四年彗星見
坤宮五十餘日而滅占其分在夏國十五年八月夏
重大漢太學親釋奠弟子員賜予有差十六年尊孔
子為文宣帝十七年改元天盛策舉人始立唱名法
十八年復建內學選名儒主之增脩律成賜名鼎新
二十八年始立通濟監鑄錢二十九年歸宋官李宗

閔上書言夏國副使屈移嘗兩使南朝以為衣冠禮樂非他國比怨金人叛盟奪其所與地此其情可見壬子歲粘罕嘗聚兵雲中以窺蜀夏人謂將圖己舉國屯境上以待其至今誠遣辯士往說之夏國必不難出兵庶足為吾聲援以圖恢復書奏不報三十年夏封其相任得敬為楚王三十一年立翰林學士院以焦景顏王僉等為學士俾脩實錄金主亮犯四川宣撫使吳璘檄西夏俾合兵討之三十二年夏國移置中書樞密於內門外大禁奢侈始封制蕃字師野利仁榮為廣惠王夏人聞金人南侵以騎兵二千至

蔡園川及馬家嶢禿頭嶺將分道入攻宣撫使吳璘
命鎮戎軍守將秦弼說諭之金兵敗夏人乃還乾道
三年五月夏國相任得敬遣間使至四川宣撫司約
共攻西蕃虞允文報以蠟書七月得敬間使再至宣
撫司夏人獲其帛書傳至金人四年夏改元乾祐得
敬以謀篡伏誅淳熙十二年二月諜報故遼國大石
牙林假道于夏以伐金密詔利西都統制吳玠與制
置使留正議之十三年四月復詔挺結夏國當時論
議可否及夏人從違史皆失書紹熙四年九月二十
日仁孝殂年七十在位五十五年改元大慶四年人

慶五年天盛二十一年乾祐二十四年謚曰聖德皇

帝廟號仁宗陵號壽陵子純佑嗣

純佑仁宗長

子也母曰章獻欽慈皇后羅氏仁宗殂即位時年十

七明年改元天慶開禧二年正月二十日廢遂殂年

三十在位十四年謚曰昭簡皇帝廟號桓宗陵號莊

陵鎮夷郡王安全立安全崇宗之孫越王仁友之子

開禧二年正月廢其主純佑自立明年改元應天嘉

定四年八月五日安全殂年四十二在位六年改元

應天四年皇建二年謚曰敬穆皇帝廟號襄宗陵號

康陵有子曰承禎齊國忠武王彥宗之子大都督府

字 三百九十六
卷之三十三
王
雜

主遵頊立

遵頊始以宗室策試進士及第為大

都督府主嘉定四年七月三日立時年四十九改元
光定金衛紹王崇慶元年三月遣使冊為夏國王七
年夏左樞密使萬慶義勇遣二僧齎蠟書來西邊欲
與共圖金人復侵地制置使黃誼不報其後金人南
遷議徙都長安遣元帥赤盞以重兵宿鞏州夏主畏
其侵迫乃遣樞密使都招討寧子寧忠翼赴蜀闕議
夾攻秦鞏聶子述俾利西安撫丁焞答書飭將吏嚴
兵以待時嘉定十二年三月也子述尋罷去焞持議
不可輕動師不可出十二月寧子寧遣使復申前說

且責我以失期時安丙再開宣閩許之命利州副都
統制程信任其責十三年八月甯子寧以師期來告
丙遂決意出師以奏劄聞諸朝不待報可命將大舉
卒無功夏人甯子寧鬼名公輔亦率其衆歸國十四
年正月丙回利州十六年遵頊自號上皇傳位於其
子德旺寶慶二年春遵頊殂年六十四改元光定十
三年謚曰英文皇帝廟號神宗丙戌七月德旺殂年
四十六改元乾定四年廟號獻宗清平郡王之子南
平王覲立二年丁亥秋為大元所取國遂亡

夏之境土方二萬餘里其設官之制多與宋同朝賀

之儀雜用唐宋而樂之器與曲則唐也河之內外州郡凡二十有二河南之州九曰靈曰洪曰宥曰銀曰夏曰石曰鹽曰南威曰會河西之州九曰興曰定曰懷曰永曰涼曰甘曰肅曰瓜曰沙熙秦河外之州四曰西寧曰樂曰廓曰積石其地饒五穀尤宜稻麥甘涼之間則以諸河為溉興靈則有古渠曰唐來曰漢源皆支引黃河故灌溉之利歲無旱澇之虞其民一家號一帳男年登十五為丁率二丁取正軍一人每負贍一人為一抄負贍者隨軍雜役也四丁為兩抄餘號空丁願隸正軍者得射他丁為負贍無則許射

正軍之疲弱者為之故壯者皆習戰鬪而得正軍為
多凡正軍給長生馬馳各一團練使以上帳一弓一
箭五百馬一橐駝五旗鼓槍劍棍棓抄袋披氈渾脫
背索鍬鑿斤斧箭牌鐵爪箇各一刺史以下無帳無
旗鼓人各橐駝一箭三百幕梁一兵三人同一幕梁
幕梁織毛為幕而以木架有砲手二百人號潑喜陟
立旋風砲於橐駝鞍縱石如拳得漢人勇者為前軍
號撞令郎着脆怯無他伎者遷河外耕作或以守肅
州有左右廂十二監軍司曰左廂神勇曰石州祥祐
曰宥州嘉寧曰韋州靜塞曰西壽保泰曰卓囉和南

曰右廂朝順曰甘州甘肅曰瓜州西平曰黑水鎮燕
曰白馬強鎮曰黑山威福諸軍兵總計五十餘萬別
有擒生十萬興靈之兵精練者又二萬五千別副以
兵七萬為資贍號御園內六班分三番以宿衛每有
事於西則自東點集而西於東則自西點集而東中
路則東西皆集用兵多立虛砦設伏兵包敵以鐵騎
為前軍乘善馬重甲刺斫不入用鉤索絞聯雖死馬
上不墜遇戰則先出鐵騎突陣陣亂則衝擊之步兵
挾騎以進戰則大將居後或據高險其人能寒暑饑
渴出戰率用隻日避晦日齋糧不過一旬弓皮弦矢

沙柳斡惡兩雪晝舉煙揚塵夜篝火以為候不耻奔
遁敗三日輒復至其處捉人馬射之號曰殺鬼招魂
或縛草人埋於地衆射而還篤信機鬼尚詛祝每出
兵則先卜卜有四一以艾灼羊脾骨以求兆名炙勃
焦二擗竹于地若揲著以求數謂之擗筭三夜以羊
焚香祝之又焚穀火布靜處晨屠羊視其腸胃通則
兵無阻心有血則不利四以矢擊弓弦審其聲知敵
至之期與兵交之勝負及六畜之蓄祥五穀之凶稔
俗皆土屋惟有命者得以瓦覆之

論曰拓跋氏考諸前史可見也自赤辭納款於貞觀

立功於天寶思恭以宥州著節於咸通夏雖未稱國
而王其土久矣子孫歷王五代宋興太祖即西平王
加彞興太尉德明在祥符間已追帝其父於國中逮
元昊始顯稱帝厥後因之與金同亡槩其歷世二百
五十八年雖嘗受封冊于宋宋亦稱有歲幣之賜誓
詔之荅要皆出於一時之言其心未嘗有臣順之實
也元昊結髮用兵凡二十年無能折其强者乾順建
國學設弟子員三百立養賢務仁孝增至三千尊孔
子為帝設科取士又置宮學自為訓導觀其陳經立
紀傳曰不有君子其能國乎今史所載追尊謚號廟

號陵名兼採夏國樞要等書其與舊史有所抵牾則
闕疑以俟知者焉

列傳卷第二百四十五

列傳卷第二百四十六 宋史四百八十七

開府儀同三司上柱國錄軍國事兼前書右丞相監修國史領經筵事都總裁臣脫脫等奉

勅修

外國三

高麗

高麗本曰高句驪禹別九州屬冀州之地周為箕子之國漢之玄菟郡也在遼東蓋扶餘之別種以平壤城為國邑漢魏以來常通職貢亦屢為邊寇隋煬帝再舉兵唐太宗親駕伐之皆不克高宗命李勣征之遂拔其城分其地為郡縣唐末中原多事遂自立君

長後唐同光天成中其主高氏累奉職貢長興中權
知國事王建承高氏之位遣使朝貢以建爲玄菟州
都督充大義軍使封高麗國王晉天福中復來朝貢
開運二年建死子武襲位漢乾祐末武死子昭權知
國事周廣順元年遣使朝貢以昭爲特進檢校太保
使持節玄菟州都督大義軍使高麗國王顯德二年
又遣使來貢加開府儀同三司檢校太尉又加太師
建隆三年十月昭遣其廣評侍郎李興祐副使李勵
希判官李彬等來朝貢四年春降制曰古先哲后奄
宅中區曷嘗不同文軌於萬方覃聲教於四海顧子

涼德猥被鴻名爰致賓王宜優錫命開府儀同三司
檢校太師玄菟州都督充大義軍使高麗國王昭日
邊鍾粹遼左推雄習箕子之餘風撫朱蒙之舊俗而
能占雲候海奉贄充庭言念傾輸實深嘉尚是用賜
之懿號醕以公田載推柔遠之恩式獎拱辰之志於
戲來朝萬里美愛戴之有孚柔撫四封庶混并之無
外永保東裔聿承天休可加食邑七千戶仍賜推誠
順化保義功臣其年九月遣使時贄等來貢涉海值
大風船破溺死者七十餘人贄僅免詔加勞恤開寶
五年遣使以方物來獻制加食邑賜推誠順化守節

保義功臣進奉使內議侍郎徐熙加檢校兵部尚書
副使內奉鄉崔鄴加檢校司農卿並兼御史大夫判
官廣評侍郎康禮試少府少監錄事廣評員外郎劉
隱加檢校尚書金部郎中皆厚禮遣之昭卒其子佑
權領國事九年佑遣使趙遵禮奉土貢以父沒當承
襲來聽朝旨授佑檢校太保玄菟州都督大義軍使
封高麗國王太宗即位加檢校太傅改大義軍爲大
順軍遣左司禦副率于延超司農寺丞徐昭文使其
國佑遣國人金行成入就學於國子監太平興國二
年遣其子元輔以良馬方物兵器來貢其年行成擢

進士第三年又遣使貢方物兵器加佖檢校太師以太子中允直舍人院張洎著作郎直史館句中正爲使四年復遣供奉官閤門祗候王僕使其國五年六月再遣使貢方物六年又遣使來貢七年佖卒其弟治知國事遣使金全奉金銀線罽錦袍褥金銀飾刀劔弓矢名馬香藥來貢且求襲位授治檢校太保玄菟州都督充大順軍使封高麗國王以監察御史李巨源禮記博士孔維奉使雍熙元年遣使韓遂齡以方物來貢二年加治檢校太傅遣翰林侍書王著侍讀呂文仲充使三年出師北伐以其國接契丹境常

為所侵遣監察御史韓國華賚詔諭之曰朕誕膺丕
構奄宅萬方華夏蠻貊罔不率俾蠢茲北裔侵敗王
略幽薊之地中朝土疆晉漢多虞夤緣盜據今國家
照臨所及書軌大同豈使齊民陷諸獷俗今已董齊
師旅殄滅妖氛惟王久慕華風素懷明略效忠純之
節撫禮義之邦而接彼邊疆罹於蠱毒舒泄積憤其
在茲乎可申戒師徒迭相掎角協比隣國同力盪平
奮其一鼓之雄戡此垂亡之寇良時不再王其圖之
應俘獲生口牛羊財物器械並給賜本國將士用申
賞勸先是契丹伐女真國路由高麗之界女真意高

麗誘導構禍因貢馬來愬于朝且言高麗與契丹結
好倚爲勢援剽略其民不復放還洎高麗使韓遂齡
入貢太宗因出女真所上告急木契以示遂齡仍令
歸白本國還其所俘之民治聞之憂懼及國華至令
人言於國華曰前歲冬末女真馳木契來告稱契丹
興兵入其封境恐當道未知宜豫爲之備當道與女
真雖爲隣國而路途遐遠彼之情僞素知之矣貪而
多詐未之信也其後又遣人告曰契丹兵騎已濟梅
河當道猶疑不實未暇營救俄而契丹雲集大擊女
真殺獲甚衆餘族敗散逃遁而契丹屢背追捕及于

當道西北德昌德成威化光化之境俘擒而去時有契丹一騎至德米河北大呼關城戍卒而告曰我契丹之騎也女真寇我邊鄙率以爲常今則復仇已畢整兵回矣當道雖聞師退猶憂不測乃以女真避兵來奔二千餘衆資給而歸之女真又勸當道控梅河津要築治城壘以爲防遏之備亦以爲然方令行視興功不意女真潛師奄至殺略吏民驅掠丁壯沒爲奴隸轉徙他方以其歲貢中朝不敢發兵報怨豈期互相誣構以惑聖聽當道世稟正朔踐修職貢敢有二心交通外國况契丹介居遼海之外復有大梅小

梅二河之阻女真渤海本無定居從何徑路以通往復橫罹讒謗憤氣填膺日月至明諒垂昭鑒間者女真逃難之衆罔不存恤亦有授以官秩尚在當國其職位高者有勿屈尼于郝元尹能達郝老正衛迦耶夫等十數人欲望召赴京闕與當道入貢之使庭辯其事則丹石之誠庶幾昭雪國華諾之乃命發兵西會治遷延未即奉詔國華屢督之得報發兵而還具錄女真之事以奏焉十月遣使朝貢又遣本國學生崔罕王彬詣國子監肄業端拱元年加治檢校太尉以考功員外郎兼侍御史知雜呂端起居舍人呂祐

之爲使二年遣使來貢詔其使選官侍郎韓蘭卿副使兵官郎中魏德柔並授金紫光祿大夫判官少府丞李光授檢校水部員外郎先是治遣僧如可賫表來覲請大藏經至是賜之仍賜如可紫衣令同歸本國淳化元年三月詔加治食邑千戶遣戶部郎中柴成務兵部員外郎直史館趙化成往使其國俗信陰陽鬼神之事頗多拘忌每朝廷使至必擇良月吉辰方具禮受詔成務在館踰月乃遺書於治曰王奕葉藩輔尊獎王室凡行大慶者被徽章今國家特馳信使以申殊寵非止歷川塗之綿邈亦復蹈溟海之艱

危皇朝睽遇斯亦隆矣而乃牽於禁忌泥於卜數眩惑日者之浮說稽緩天子之命書惟典冊之垂文非卜祝之能曉是以書称上日不推六甲之元辰禮載仲冬但取一陽之嘉會粲然古訓足以明稽所宜改圖速拜君賜儻鳳縟無滯克彰拱極之誠則龍節有輝免貽辱命之責謹以誠告王其聽之治覽書慚懼遣人致謝焉會霖雨不止仍以俟霽為請成務復遺書以責之治翌日乃出拜命二年遣使韓彥恭來貢彥恭表述治意求印佛經詔以藏經并御製祕藏銓道遥詠蓮華心輪賜之四年正月治遣使白思柔貢

方物并謝賜經及御製二月遣秘書丞直史館陳靖
秘書丞劉式爲使加治檢校太師仍降詔存問軍吏
耆老靖等自東牟趣八角海口得思柔所乘海船及
高麗水工即登舟自芝岡島順風泛大海再宿抵甕
津口登陸行百六十里抵高麗之境曰海州又百里
至閻州又四十里至白州又四十里至其國治迎使
于郊盡藩臣禮延留靖等七十餘日而還遺以襲衣
金帶金銀器數百兩布三萬餘端附表稱謝先是三
年上親試諸道貢舉人詔賜高麗賓貢進士王彬崔
罕等及第既授以官遣還本國至是靖等使回治上

表謝曰學生王彬崔罕等入朝習業蒙恩並賜及第
授將仕郎守祕書省校書郎仍放歸本國竊以當道
荐修貢奉多歷歲年盖以上國天高遐荒海隔不獲
躬趨金闕面叩玉階唯深拱極之誠莫展來庭之禮
彬罕等幼從匏繫嗟混迹於岨夷不憚蓬飄早賓王
於天邑緼袍短褐玉粒桂薪堪憂食貧若爲卒歲皇
帝陛下天慈照毓海量優容豐其館穀之資勗以藝
文之業去歲高懸軒鑑大選魯儒彬罕接武澤宮敢
萌心於中鵠濫巾英域空有志於羨魚陛下以其萬
里辭家十年觀國俾登名於桂籍仍命秩於芸臺憫

其懷土之心慰以倚門之望別垂宸旨令歸故鄉玄
造曲成鴻恩莫報臣不勝感天戴聖之至又有張仁
銓者進奉使白思柔之孔目吏也上書獻便宜思柔
意其持國陰事以告仁銓懼不敢歸上命靖等領以
還國仍詔治釋仁銓罪治又上表謝曰官告國信使
陳靖劉式至奉傳聖旨以當道進奉使從行孔目官
張仁銓至闕輒進便宜翻懷憂懼今附使臣帶歸本
國者仁銓謁宅細民海門賤吏獲趨上國敢貢愚誠
罔思狂瞽之尤輒奏權宜之事妄塵旒冕上黷朝廷
今者仰奉綸言釋其罪咎小人趨利豈虞僭越之求

聖主寬恩遠降哀矜之命其張仁銓者已依詔旨放
罪令掌事如故又上言願賜板本九經書用敦儒教
許之先是式等復命治遣使元證衍送之證衍至安
香浦口值風損船溺所賫物詔登州給證衍文據遣
還仍賜治衣段二百疋銀器二百兩羊五十口五年
六月遣使元郁來乞師愬以契丹寇境朝廷以北鄙
甫寧不可輕動干戈爲國生事但賜詔慰撫厚禮其
使遣還自是受制于契丹朝貢中絕治卒弟誦立嘗
遣兵校徐遠來候朝廷德音遠久不至咸平三年其
臣吏部侍郎趙之遴命牙將朱仁紹至登州偵之州

將以聞上特召見仁紹因自陳國人思慕皇化爲契
丹羈制之狀乃賜誦鈿函詔一道令仁紹賫還六年
誦遣使戶部郎中李宣古來朝謝恩且言晉割燕薊
以屬契丹遂有路趣玄菟屢來攻伐求取不已乞王
師屯境上爲之牽制詔書優答之誦卒第詢權知國
事先是契丹既襲高麗遂築六城曰興州曰鐵州曰
通州曰龍州曰龜州曰郭州于境上契丹以爲貳已
遣使來求六城詢不許遂舉兵奄至城下焚蕩宮室
剽劫居人詢徙居昇羅州以避之兵退乃遣使請和
契丹堅以六城爲辭自是調兵守六城大中祥符三

年大舉來伐詢與女真設奇邀擊殺契丹殆盡詢又于鴨綠江東築城與來遠城相望跨江爲橋潛兵以固新城七年方遣告奏使御事工部侍郎尹證古以金線織成龍鳳鞍并綉龍鳳鞍幪各二幅細馬二疋散馬二十疋來貢證古還賜詢詔書七通并衣帶銀綵鞍勒馬等八年詔登州置館於海次以待使者其年又遣御事民官侍郎郭元來貢元自言本國城無垣墻府曰開城管六縣民不下三五千有州軍百餘置十路轉運司統之每州管縣五六小者亦三四每縣戶三四百國境南北千五百里東西二千里軍民

雜處隸軍者不黥面方午為市不用錢第以布米買
易地宜秔稻風俗頗類中國無羊兔橐駝水牛驢氣
候少寒暑差多有僧無道士民家器皿悉銅為之樂
有二品曰庫樂曰鄉樂三歲一試舉人有進士諸科
筭學每試百餘人登第者不過一二十每正月一日
五月五日祭祖禰廟又正月七日家為王母像戴之
二月望僧俗燃燈如中國上元節上巳日以青艾染
餅為盤羞之冠端午有鞦韆之戲士女服尚素地產
龍鬚席藤席白碯紙鼠狼尾筆元辭貌恭恪每受宴
賜必自為謝表粗有文采朝廷待之亦厚九年辭還

賜詢詔書七函襲衣金帶噐幣鞍馬及經史曆日聖
惠方等元又請錄國朝登科記及所賜御詩以歸從
之天禧元年遣御事刑官侍郎徐訥奉表獻方物于
崇政殿又賀封建壽春郡王三年九月登州言高麗
進奉使禮賓卿崔元信至秦王水口遭風覆舟漂失
貢物詔遣內臣撫之十一月元信等入見貢罽錦衣
褥烏漆甲金飾長刀七首罽錦鞍馬紵布藥物等又
進中布二千端求佛經一藏詔賜經還布以元信覆
溺匱乏別賜衣服繒絲焉明州登州屢言高麗海船
有風漂至境上者詔令存問給度海糧遣還仍爲著

例五年詢遣告奏使御事禮部侍郎韓祚等一百七十九人來謝恩且言與契丹修好又表乞陰陽地理書聖惠方並賜之金行成者累官至殿中丞治表乞放還行成自以筮仕朝廷不願歸本國又以父母垂老在海外旦暮思念恨祿不及令工圖其像置正寢與妻史氏居旁室晨夕定省上食未嘗少懈淳化初通判安州被病知州李範與僚佐數人省之行成病已篤泣且言曰行成外國人爲朝官佐郡政病且死未有以報主恩雖瞑目固有遺恨二子宗敏宗訥皆幼家素貧無他親可依旦暮委溝壑矣未幾行成死

其妻養二子誓不嫁織履以給範表其事詔以宗敏
補太廟齋郎令安州月給其家錢叁緡米五斛長吏
歲時存問又高麗信州永寧人康戩字休祐父允三
世爲兵部侍郎戩少好學時紇升與契丹交兵戩從
允戰木葉山下連中二矢神色不變後陷契丹遁居
墨斗嶺又至黃龍府間道得歸高麗時允猶在開寶
中允遣戩隨賓貢肄業國學太平興國五年登進士
第解褐大理評事知湘鄉縣再遷著作佐郎知江陰
軍江州歷官以清白幹力聞改太常博士蘇易簡在
翰林稱其吏才命爲廣南西路轉運副使賜緋魚就

遷正使再轉度支員外郎戶部判官出知峽越二州
連被詔褒其能政又爲京西轉運使加工部郎中賜
金紫戩所至好行事上章多建白以竭誠自任景德
三年卒真宗特以其子希齡爲太常寺奉禮郎給奉
終喪乾興元年二月祚等辭歸國賜詢如故事會真
宗晏駕又賫遺物以賜詢天聖八年詢復遣御事民
官侍郎元頴等二百九十三人奉表入見於長春殿
貢金器銀罽刀劍鞍勒馬香油人參細布銅器硃黃
青鼠皮等物明年二月辭歸賜予有差遣使護送至
登州其後絕不通中國者四十三年詢孫徽嗣立是

爲文王熙寧二年其國禮賓省移牒福建轉運使羅
拯云本朝商人黃真洪萬來稱運使奉密旨令招接
通好奉國王旨意形于部述當國僻居賜谷邈戀天
朝頃從祖禰以來素願梯航相繼最爾平壤邇于大
遼附之則爲睦鄰踈之則爲勍敵慮邊騷之弗息蓄
陸襲以靡遑久困羈縻難圖携貳故違述職致有積
年屢卜雲祥雖美聖辰於中國空知日遠如迷舊路
於長安運屬垂鴻禮稽展慶大朝化覃無外度豁包
荒山不謝乎纖埃海不辭於支派謹當遵尋通道端
赴橐街但茲千里之傳聞恐匪重霄之紆眷今以公

狀附真萬西還俟得報音即備禮朝貢徽又自言嘗
夢至中華作詩紀其事三年拯以聞朝廷議者亦謂
可結之以謀契丹神宗許焉命拯諭以供擬腴厚之
意徽遂遣民官侍郎金悌等百十人來詔待之如夏
國使往時高麗人往反皆自登州七年遣其臣金良
鑑來言欲遠契丹乞改塗由明州詣闕從之郡縣供
頓無舊準頗擾民詔立式頒下費悉官給又以其不
適華言恐規利者私與交關令所至禁止徽問遺二
府甚厚詔以付市易務售縑帛答之又表求鑿藥畫
塑之工以教國人詔羅拯募願行者九年復遣崔思

訓來命中貴人倣都亭西驛例治館待之寔厚其使
來者亦益多嘗獻伶官十餘輩曰夷樂無足觀止欲
潤色國史爾帝以其國尚文每賜書詔必選詞臣著
撰而擇其善者元豐元年始遣安壽左諫議大夫陳
睦假起居舍人往聘造兩艦於明州一曰凌虛安濟
致遠次曰靈飛順濟皆名爲神舟自定海絕洋而東
旣至國人歡呼出迎徽具袍笏玉帶拜受詔與壽睦
尤禮館之別宮標曰順天館言尊順中國如天云徽
已病僅能拜命且乞鑿藥二年遣王舜封挾鑿往診
治徽又使柳洪來謝海中遇風失所貢物洪上章自

劾敕書安慰尋獻日本所造車曰諸侯不貢車服故不敢與土貢同前此貢物至輒下有司估直償以萬緡至是命勿復估以萬緡爲定數六年徽卒在位三十八年治尚仁恕爲東夷良主然猶循其俗王女不下嫁臣庶必歸之兄弟宗族貴臣亦然次子運諫以爲旣通上國宜以禮革故習徽怒斥之于外訃聞天子閔焉詔明州修浮屠供一月遣楊景略王舜封祭奠錢勰宋球弔慰景略辟李之儀書狀帝以之儀文稱不著宜得問學博洽噐宇整秀者召赴中書試以文乃遣又以遠服不責其備諭使者以相見之所殿

名鴟吻皆聽勿避徽子順王勳嗣百日卒第宣王運
仁賢好文內行飭備每賈客市書至則縈服焚香對
之八年遣其弟僧統來朝求問佛法并獻經像哲宗
立遣使金上琦奉慰林暨致賀請市刑法之書太平
御覽開寶通禮文苑英華詔惟賜文苑英華一書以
名馬錦綺金帛報其禮運立四年卒子懷王堯嗣未
閱歲以病不能爲國國人請其叔父鷄林公熙衛攝
政未幾堯卒熙乃立凡數歲使不至元祐四年其王
子義天使僧壽介至杭州祭亡僧言國母使持二金
塔爲兩宮壽知州蘇軾奏却之語在軾傳熙後避遼

主諱改名顯顯性貪吝好奪商賈利富室犯法輒久
縻責贖雖微罪亦輸銀數斤五年復通使賜銀器五
千兩七年遣黃宗慤來獻黃帝鍼經請市書甚衆禮
部尚書蘇軾言高麗入貢無絲髮利而有五害今請
諸書與收買金箔皆宜勿許詔許買金箔然卒市冊
府元龜以歸元符中遣士賓貢徽宗立遣任懿王嘏
來弔賀崇寧二年詔戶部侍郎劉逵給事中吳玘往
使顯卒子俱嗣貢使接踵且令士子金瑞等五人入
太學朝廷爲置博士政和中升其使爲國信禮在夏
國上與遼人皆隸樞密院改引伴押伴官爲接送館

伴賜以大晟燕樂籩豆簠簋尊罍等器至宴使者于
睿謨殿中宣和四年侯卒初高麗俗兄終弟及至是
諸弟爭立其相李資深立侯子楷來告哀詔給事中
路允迪中書舍人傅墨卿奠慰侯之在位也求醫於
朝詔使二鑿徃留二年而歸楷語之曰聞朝廷將用
兵伐遼遼兄弟之國存之足為邊扞女真狼虎耳不
可交也業已然願二鑿歸報天子宜早為備歸奏其
言已無及矣欽宗立賀使至明州御史胡舜陟言高
麗靡敝國家五十年政和以來人使歲至淮浙之間
苦之彼昔臣事契丹今必事金國安知不窺我虛實

以報宜止勿使來乃詔留館於明而納其贄幣明年始歸國自王徽以降雖通使不絕然受契丹封冊奉其正朔上朝廷及他文書蓋有稱甲子者歲貢契丹至於六而誅求不已常云高麗乃我奴耳南朝何以厚待之使至其國尤倨暴館伴及公卿小失意輒行摔善聞我使至必假他事來覘分取賜物嘗詰其西向修貢事高麗表謝其略曰中國三甲子方得一朝大邦一周天每修六貢契丹悟乃得免高宗即位慮金人通於高麗命迪功郎胡蠡假宗正少卿爲高麗國使以間之蠡之回史失書二年浙東路馬步軍都

總管楊應誠上言由高麗至女真路甚徑請身使三
韓結鷄林以圖迎二聖乃以應誠假刑部尚書充高
麗國信使浙東帥臣翟汝文奏言應誠欺罔爲身謀
耳若高麗辭以金人亦請問津以窺吳越其將何辭
以對萬一辱命取笑遠夷願毋遣應誠聞之遂與副
使韓衍書狀官孟健由杭州浮海以行六月抵高麗
諭其王措以所欲爲措曰大朝自有山東路蓋不由
登州往應誠曰以貴國路徑耳措有難色已而命其
門下侍郎傅佺至館中果對如翟汝文言應誠曰女
真不善水戰佺曰彼常於海道往來况女真舊臣本

國今反臣事之其強弱可見矣居數月復遣其中書侍郎崔洪宰知樞密院金富軾持前議不變謂二聖今在燕雲大朝雖盡納土未必可得何不練兵與戰終不奉詔應誠留兩月餘不得已見措於壽昌門受其拜表而還十月至闕入對言狀上以措負國恩怒甚尚書右丞朱勝非曰彼鄰金人與中國隔海利害甚明曩時待之過厚今安能責其報也右僕射黃潛善曰以巨艦載精兵數萬徑擣其國彼寧不懼勝非曰越海興師燕之事可爲近鑒上怒解十一月措遣其臣尹彥頤奉表謝罪詔以二聖未歸燕設不宜

用樂乃設幕殿門外命客省官吳得興伴賜酒食命
中書舍人張澂押伴如禮遣還三年八月上謂輔臣
曰聞上皇遣內臣宮女各二人隨高麗貢使來朕聞
之悲喜交集呂頤浩曰此必金人之意不然高麗必
不敢安知非窺我虛實以報於是詔止之略曰王緬
守基圖夙同文軌乃附乘桴之信嗣修貢篚之恭惟
忠順之無他質神明而靡愧屬關聞聽良用歎嘉言
念晚年實為多故舉中原之生聚遭強敵之震驚旣
涉境以采深猶稱兵而未已茲移仗衛暫駐江湖如
行使之果來恐有司之不戒俟休邊境當問聘期壞

晉館以納車庶無後悔閉漢關而謝質非用前規想
彼素懷知吾誠意紹興元年十月高麗將入貢禮部
侍郎柳約言四明殘破之餘荒蕪單弱恐起戎心宜
屯重兵以俟其至十一月詔柳約奉使高麗不果行
二年閏四月措遣其禮部員外郎崔惟清閤門祗候
沈起入貢金百兩銀千兩綾羅二百疋人參五百斤
惟清所獻亦三之一上御後殿引見賜惟清起金帶
二荅以溫詔遣還是月定海縣言民亡入高麗者約
八十人願奉表還國詔候到日高麗綱首卓榮等量
與推恩十二月聞高麗遣知樞密院事洪彝叙等六

十五人來貢議以臨安府學館其使言者謂雖在兵
間不可無學恐爲所窺詔以洪惠寺爲同文館以待
之既而卒不至六年高麗持牒官金稚圭至明州賜
銀帛遣之懼其爲金間也三十二年三月高麗綱首
徐德榮詣明州言本國欲遣賀使守臣韓仲通以聞
殿中侍御史吳希奏曰高麗與金人接壤昔稚圭之
來朝廷懼其爲間亟遣還今兩國交兵德榮之請得
無可疑使其果來猶恐不測萬一不至貽笑遠方詔
止之隆興二年四月明州言高麗入貢史不書引見
日恐同彛叙之詐其後使命遂絕慶元間詔禁商人

持銅錢入高麗蓋絕之也初高麗入使明越困於供給朝廷館遇燕賚錫予之費以鉅萬計饋其主者不在焉我使之行每乘二神舟費亦不貲三節官吏糜爵捐廩皆仰縣官昔蘇軾言于先朝謂高麗入貢有五害以此也惟是國於吳會事異東都昔高麗入使率由登萊山河之限甚遠今直趨四明四明距行都限一浙水耳由海道奉使高麗瀰漫汪洋洲嶼險阻遇黑風舟觸礁輒敗出急水門至群山島始謂平達非數日不至也舟南北行遇順風則歷險如夷至不數日其國東西二千里南北五百里西北接契丹

恃鴨綠江以爲固江廣三百步其東所臨海水清澈
下視十丈東南望明州水皆碧王居開州蜀莫郡曰
開成府依大山置宮室立城壁名其山曰神嵩民居
皆茅茨大止兩椽覆以瓦者才十二以新羅爲東州
樂浪府號東京石濟爲金州金馬郡號南京平壤爲
鎮州號西京西京最盛總之凡三京四府八牧郡百
有十八縣鎮三百九十洲島三千七百郡邑之小者
或只百家男女二百十萬口兵民僧各居其一地寒
多山土宜松栢有秔黍麻麥而無材以秔爲酒少絲
蠶匹縑直銀十兩多衣麻紵王出乘車駕牛歷山險

乃騎紫衣行前捧護國仁王經以導出令曰教曰宣
臣民呼之曰聖上私謂曰嚴公后妃曰宮主百官名
稱階勲功臣檢校頗與中朝相類過御史臺則下馬
遠者有劾士人以族望相高柳崔金季四姓爲貴種
無宦者以世族子爲內侍六衛歲十二月朔王生紫
門小殿注官外官則付國相有國子監四門學學者
六千人貢士三等王城曰土貢郡邑曰鄉貢他國人
曰賓貢間歲試于所屬再試于學所取不過三四十
人然後王親試以詩賦論三題謂之簾前重試亦有
制科宏詞之目然特文具而已士尚聲律少通經王

城有華人數百多閩人因賈舶至者密試其所能誘以祿仕或強留之終身朝廷使至有陳牒來訴者則取以歸百官以來爲奉皆給田納祿半給死乃拘之國無私田民計口授業十六以上則充軍六軍三衛常留官府三歲以選戍西北半歲而更有警則執兵任事則服勞事已復歸農畝王亦有分地以供私用王母妃主世子皆受湯沐田上下以賈販利入爲事日中爲虛用米布貿易地產銅不知鑄錢中國所予錢藏之府庫時出傳訖而已崇寧後始學鼓鑄有海東通寶重寶三韓通寶三種錢然其俗不便也兵器

踈簡無強弩大刀崇尚釋教雖王子弟亦常一人爲僧信鬼拘陰陽病不相視斂不撫棺貧者死則露置中野歲以建子月祭天國東有穴號歲神常以十月望日迎祭謂之八關齋禮儀甚盛王與妃嬪登樓大張樂宴飲賈人曳羅爲幕至百疋相聯以示富三歲大祭祠遍其封內因是斂民財而王與諸臣分取之祖廟在國門之外大祭則具車服冕圭親祠王城有佛寺七十區而無道觀大觀中朝廷遣道士往乃立福源院置羽流十餘輩俗不知鑿自王侯來請醫後始有通其術者人首無枕骨背扁側男子巾幘如唐

裝婦人髻髻垂右肩餘髮被下約以絳羅貫之簪旋
裙重疊以多爲勝男女自爲夫婦者不禁夏月同川
而浴婦人僧尼皆男子拜樂聲甚下無金石之音既
賜樂乃分爲左右二部左曰唐樂中國之音也右曰
鄉樂其故習也堂上設席升必脫履見尊者則膝行
必跪應必唯其拜無不荅子拜父猶半荅其禮性仁
柔惡殺不屠宰欲食羊豕則包以蒿而燔之刑無慘
酷之科唯惡逆及罵父母者斬餘皆杖肋外郡刑殺
悉送王城歲以八月減囚死罪貸流諸島累赦眠輕
重原之自明州定海遇便風三日入洋又五日抵墨

山入其境自墨山過島嶼詰曲礁石間舟行甚駛七
日至禮成江江居兩山間束以石峽湍激而下所謂
急水門最爲險惡又三日抵岸有館曰碧瀾亭使人
由此登陸崎嶇山谷四十餘里乃其國都云

列傳卷第二百四十六

列傳卷第二百四十七 宋史四百八十八

開府儀同三司上柱國錄軍國事尚書右丞相監修國史領經筵事都總裁院等奉

敕修

外國四

交趾 大理

交趾本漢初南越之地漢武平南越分其地為儋耳珠崖南海蒼梧鬱林合浦交趾九真日南凡九郡置交趾刺史以領之後漢置交州晉宋齊梁陳因之又為交趾郡隋平陳廢郡置州煬帝初廢州置郡唐武德中改交州總管府至德中改安南都護府梁貞明

中土豪曲承美專有其地送款於末帝因授承美節
鉞時劉隱擅命嶺表遣將李知順伐承美執之乃并
有其地後有楊延藝紹洪皆受廣南署繼為交趾節
度使紹洪卒州將吳昌岌遂居其位昌岌死其弟昌
文襲乾德初昌文死其參謀吳處珩峯州刺史矯知
護武寧州刺史楊暉牙將杜景碩等爭立管內一十
二州大亂部民嘯聚起為寇盜攻交州先是楊延藝
以牙將丁公著攝驩州刺史兼禦蕃都督部領即其
子也公著死部領繼之至是部領與其子璉率兵擊
敗處珩等賊黨潰散境內安堵交民德之乃推部領

爲交州帥號曰大勝王署其子璉爲節度使凡三年
遜璉位璉立七年聞嶺表平遂遣使貢方物上表內
附制以權交州節度使丁璉以檢校太師充靜海軍
節度使安南都護又詔以進奉使鄭琇王紹祚並爲
檢校左散騎常侍兼御史大夫八年遣使貢犀象香
藥朝廷議崇寵部領降制曰率土來王方推以恩信
舉宗奉國宜洽於封崇眷拱極之外臣舉顯親之茂
典爾部領世爲右族克保遐方夙慕華風不忘內附
屬九州混一五嶺廓清靡限滇濤樂輸琛賚嘉乃令
子稱吾列藩特被鴻私以旌義訓介爾眉壽服茲寵

章可授開府儀同三司檢校太師封交趾郡王太宗
即位璉又遣使以方物來賀部領及璉既死璉弟璿
尚幼嗣立稱節度行軍司馬權領軍府事大將黎桓
擅權樹黨漸不可制却遷璿於別第舉族禁錮之代
總其衆太宗聞之怒乃議舉兵太平興國五年秋詔
以蘭州團練使孫全興八作使張璿左監門衛將軍
崔亮爲陸路兵馬部署自邕州路入寧州刺史劉澄
軍器庫副使賈湜供奉官閤門祗候王僕爲水路兵
馬部署自廣州路入是冬黎桓遣牙校江巨湟齎方
物來貢仍爲丁璿上表曰臣族本蠻酋辟處海裔修

職貢於宰放假節制於方隅臣之父兄代承閩寄謹
保封略罔敢怠違爰暨淪亡將墜堂構將吏耄臺乃
屬於臣俾搆軍旅之事用安夷落之衆土俗獷悍懇
請愈堅拒而弗從慮其生變臣已攝節度行軍司馬
權領軍府事願賜真秩令備列藩干冒宸宸伏增震
越上察其欲緩王師寢而不報王師進討破賊萬餘
衆斬首二千餘級六年春又破賊于白藤江口斬首
千餘級獲戰艦二百艘甲冑萬計轉運使侯仁寶率
前軍先進全興等頗兵花步七十日以候澄仁寶累
促之不進及澄至并軍由水路至多羅村不遇賊復

擅迴花步桓詐降以誘仁寶遂爲所害轉運使許仲
宣馳奏其事遂班師上遣使就劾澄湜僕澄尋病死
戮湜等邕州市全興至闕亦下吏誅餘抵罪有差仁
寶贈工部侍郎七年春桓懼朝廷終行討滅復以丁
璿爲名遣使貢方物上表謝罪八年桓自稱權交州
三使留後遣使貢方物并以璿表來上帝賜桓詔曰
丁氏傳襲三世保據一方卿既受其倚毗爲之心膂
克徇邦人之請無負丁氏之心朕且欲令璿爲統帥
之名卿居副貳之任剴裁制置悉繫於卿俟丁璿既
冠有所成立卿之輔翼令德彌光崇獎忠勲朕亦何

吝若丁璿將材無取童心如故然其奕世紹襲載綿
星紀一旦捨去節鉞降同士伍理既非便居亦靡安
詔到卿宜遣丁璿母子及其親屬盡室來歸俟其入
朝便當揆日降制授卿節旌凡茲兩途卿宜審處其
一丁璿到京必加優禮今遣供奉官張宗權齎詔諭
旨當悉朕懷亦賜璿詔書如旨時黎桓已專據其土
不聽命是歲五月上言占城國水陸象馬數萬來寇
率所部兵擊走之俘斬千計雍熙二年遣牙校張紹
馮阮伯簪等貢方物繼上表求正領節鎮三年秋又
遣使貢方物儋州言占城國人蒲羅遏率其族百餘

衆內附言爲交州所逼故也是歲十月制曰王者懋
建皇極寵綏列藩設邸京師所以盛會同之禮胙土
方面所以表節制之雄矧茲踰鳶之隅克修設羽之
貢式當易帥爰利建侯不忘請命之恭用舉疇勞之
典權知交州三使留後黎桓兼資義勇特稟忠純能
得邦人之心彌謹藩臣之禮徃者丁璿方在童幼昧
於撫綏桓乃肺腑之親專掌軍旅之事號令自出威
愛並行璿盡解三使之權以徇衆人之欲遠輸誠款
求領節旌士燮疆明化越俗而咸乂尉佗恭順稟漢
詔以無違宜正元戎之稱以列通侯之貴控撫夷落

對揚天休可檢校太保使持節都督交州諸軍事安
南都護充靜海軍節度交州管内觀察處置等使封
京兆郡侯食邑三千戶仍賜號推誠順化功臣遣左
補闕李若拙國子博士李覺爲使以賜之端拱元年
加桓檢校太尉進邑千戶實封五百戶遣戶部郎中
魏庠虞部員外郎直史館李度徃使焉淳化元年夏
加桓特進邑千戶實封四百戶遣左正言直史館宋
鎬右正言直史館王世則又使焉明年六月歸闕上
令條列山川形勢及黎桓事迹以聞鎬等具奏曰去
歲秋末抵交州境桓遣牙內都指揮使丁承正等以

船九艘卒三百人至太平軍來迎由海口入大海員
涉風濤頗歷危險經半月至白藤徑入海汊乘潮而
行凡宿泊之所皆有茅舍三間營葺尚新自爲館驛
至長州漸近本國桓張皇虛誕務爲誇詫盡出舟師
戰懼謂之軍自是宵征抵海岸至交州僅十五里有
茅亭五間題曰茅徑驛至城一百里驅部民畜產妄
稱官牛數不滿千揚言十萬又廣率其民混於軍旅
以雜色之衣乘船鼓譟近城之山虛張白旗以爲陳
兵之象俄而擁從桓至展郊迎之禮桓歛馬側身問
皇帝起居畢按轡偕行時以檳榔相遺馬上食之此

風俗待賓之厚意也城中無居民止有茅竹屋數十
百區以爲軍營而府署湫隘題其門曰明德門桓質
陋而目眇自言近歲與蠻寇接戰墜馬傷足受詔不
拜信宿之後乃張筵飲宴又出臨海以爲娛賓之
遊桓跣足持竿入水標魚每中一魚左右皆叫譟歡
躍凡有宴會預坐之人悉令解帶冠以帽子桓多衣
花纈及紅色之衣帽以真珠爲飾或自歌勸酒莫能
曉其詞嘗令數十人扛大蛇長數丈饋於使館且曰
若能食此當治之爲饌以獻焉又羈送二虎以備縱
觀皆却之不受士卒殆三千人悉黥其額曰天子軍

糧以未穗日給令自舂爲食兵器止有弓弩木牌梭
槍竹槍弱不可用桓輕佻殘忍昵比小人腹心闇豎
五七輩錯立其側好狎飲以手令爲樂凡官屬善其
事者擢居親近左右有小過亦殺之或鞭其背一百
至二百賓佐小不如意亦捶之三十至五十黜爲閹
吏怒息乃召復其位有木塔其制樸陋桓一日請同
登遊覽地無寒氣十一月猶衣夾衣揮扇云四年進
封桓交趾郡王五年遣牙校費崇德等來修職貢然
桓性本克狠負阻山海屢爲寇害漸失藩臣禮至道
元年春廣南西路轉運使張觀欽州如洪鎮兵馬監

押衛昭美皆上言有交州戰船百餘艘寇如洪鎮略
居民劫廩實而去其夏桓所管蘇茂州又以鄉兵五
千寇邕州所管綠山都巡檢楊文傑擊走之太宗志
在撫寧荒服不欲問罪觀又言風聞黎桓爲丁氏斥
逐擁餘衆山海間失其所據故以寇鈔自給今則桓
已死觀仍上表稱賀詔太常丞陳士隆高品武元吉
奉使嶺南因偵其事士隆等復命所言與觀同其實
桓尚存而傳聞者之誤觀等不能審覈未幾有大賈
自交趾回具言桓爲帥如故詔劾觀等會觀病卒昭
美士隆元吉抵罪先是欽州如洪咄步如昔等三鎮

皆瀕海交州潮陽民卜文勇等殺人并家七命至如昔鎮鎮將黃令德等匿之桓令潮陽鎮將黃成雅移牒來捕令德固不遣因茲海賊連年剽掠二年以工部員外郎直史館陳堯叟爲轉運使因賜桓詔書堯叟始至遣攝雷州海康縣尉李建中賫詔勞問桓堯叟又至如昔詰得匿文勇之由盡擒其男女老少一百三十口召潮陽鎮吏付之且戒勿加酷法成雅得其人以狀謝堯叟桓遂上章感恩并捕海賊二十五人送于堯叟且言已約勒谿洞首領不得騷動七月太宗遣主客郎中直昭文館李若拙賫詔書充國信

使以美玉帶往賜桓若拙既至桓出郊迎然其詞氣尚悖慢謂若拙曰向者劫如洪鎮乃外境蠻賊也皇帝知此非交州兵否若使交州果叛命則當首攻番禺次擊閩越豈止如洪鎮而已若拙從容謂桓曰上初聞寇如洪鎮雖未知其所自然以足下拔自交州牙校授之節制固當盡忠以報豈有他慮及見執送海賊事果明白然而大臣僉議以爲朝廷比建節帥以寧海表今既蠻賊爲寇害乃是交州力不能獨制矣請發勁卒數萬會交兵以剪滅之使交廣無後患上曰未可輕舉慮交州不測朝旨或致驚駭不若且

委黎桓討擊之亦當漸至清謚今則不復會兵也桓愕然避席曰海賊犯邊守臣之罪也聖君容貸恩過父母未加誅責自今謹守職約保未清於漲海因北望頓首謝真宗即位進封桓南平王兼侍中桓前遣都知兵馬使阮紹恭副使趙懷德以金銀七寶裝交椅一銀盆十犀角象牙五十枚綃綉布萬匹來貢詔陳于萬歲殿太宗神御許紹恭等拜奠及迴賜桓帶甲馬詔書慰獎咸平四年又遣行軍司馬黎紹留使副何慶常以馴犀一象二象獬二七寶裝金瓶一來貢其年欽州言交州効誠場民及頭首八州使黃慶

集等數百人來投有詔慰撫遣還本道廣南西路言
黎桓迎受官告使黃成雅附奏自今國朝加恩願遣
使至本道以寵海裔先是使至交州桓即以供奉爲
辭因緣賦斂上聞之止令疆吏召授命不復專使景
德元年又遣其子攝驩州刺史明提來貢懇求加恩
使至本道慰撫遐裔許之仍以明提爲驩州刺史二
年上元節賜明提錢令與占城大食使觀燈宴飲因
遣工部員外郎邵晔充國信使三年桓卒立中子龍
鉞龍鉞兄龍全劫庫財而遁其弟龍廷殺龍鉞自立
龍廷兄明護率扶闌砦攻戰明提以國亂不能還特

詔廣州優加資給知廣州凌策等言桓諸子爭立衆
心離叛頭首黃慶集黃秀蠻等千餘人以不從驅率
戮及親族來投廉州請發本道二千人平之慶集等
願爲前鋒上以桓素忠順屢修職貢今幸亂而伐喪
不可就改國信使邵晔爲緣海安撫使令晔譬之慶
集等仍計口賜田糧晔乃貽書交州諭以朝廷威德
如其自相魚肉久無定位偏師問罪則黎氏盡滅矣
明護懼即奉龍廷主軍事龍廷自稱節度開明王遂
欲修貢晔以聞上曰遐荒異俗不曉事体何足恠也
令削去僞官晔又言頭首黃慶集先避亂歸化其種

族尚多若復遣還慮遭屠戮詔以慶集隸三班釐務
于郴州遂許入貢四年龍廷稱權安南靜海軍留後
遣弟峯州刺史明相副使安南掌書記殿中丞黃成
雅等來貢會含光殿大宴上以成雅坐遠欲稍升位
著訪於宰相王旦旦曰昔子產朝周周王饗以上卿
之禮子產固辭受下卿之禮而還國家惠綏遠方優
待客使固無嫌也乃升成雅于尚書省五品之次詔
拜龍廷特進檢校太尉充靜海軍節度觀察處置等
使安南都護兼御史大夫上柱國仍封交阯郡王食
邑三千元食實封一千戶賜推誠順化功臣仍賜名

至忠給以旌節又追贈桓中書令南越王進奉使黎
明昶等並進秩大中祥符元年天書降加翊戴功臣
食邑七百元實封三百元東封畢加至忠同平章事
食邑一千元食實封四百元二年廣南西路言蠻人
劫海口蠻戶如洪若主李文著以輕兵襲逐中流矢
死詔督安南捕賊明年執狄獠十三人以獻至忠又
遣推官阮守疆以犀角象齒金銀紋綳等來貢并獻
馴犀一上以犀遠土性不可豢畜卻不納又以逆至
忠意使者既去乃令縱之海澨三年遣使來朝表求
甲冑具裝詔從其請又求互市于邕州本道轉運使

以聞上曰瀕海之民數患交州侵寇仍前止許廉州
及如洪砦互市蓋爲邊隅控扼之所今或直趨內地
事頗非便詔令本道以舊制諭之至忠纔年二十六
苛虐不法國人不附大校李公蘊尤爲至忠親任嘗
令以黎爲姓其年遂圖至忠逐之殺明提明昶等自
稱留後遣使貢奉上曰黎桓不義而得公蘊尤而効
之甚可惡也然以其蠻俗不足責遂用桓故事制授
特進檢校太傅充靜海軍節度觀察處置等使安南
都護兼御史大夫上柱國封交阯郡王食邑三千戶
實封一千元賜推誠順化功臣公蘊又表求太宗御

書詔賜百軸四年祀汾陰后土公蘊遣節度判官梁
任文觀察巡官黎再嚴以方物來貢禮成加公蘊同
平章事食邑一千元實封四百戶任文等並優進秩
五年夏以進奉使李仁美爲誠州刺史陶慶文爲太
常丞其從隸有道病死者所賜附還其家是冬聖祖
降加公蘊開府儀同三司食邑七百元實封三百戶
賜翊戴功臣七年春又加保節守正功臣食邑一千
元實封四百戶詔交趾諸國使入貢者所在館餼供
億務令豐備其年遣知唐州刺史陶碩等來貢詔以
碩爲順州刺史充安南靜海軍行軍司馬副使吳懷

副爲澄州刺史充節度副使先是交州狄獠張婆看避罪來奔知欽州穆重穎召之至中路復拒焉都巡檢臧嗣遂令如洪砮犒以牛酒交州偵知其事因捕狄獠故鈔如洪砮掠人畜甚衆詔轉運司督公蘊追索仍令疆吏自今不得誘召蠻獠致生事公蘊或間歲或仍歲以方物入貢天禧元年進封公蘊南平王加食邑一千元實封四百元三年加檢校太尉食邑一千元實封四百元每加恩皆遣使將命至其境上仍賜噐幣襲衣金帶鞍馬焉仁宗即位加公蘊檢校太師遣長州刺史李寬泰都護副使阮守疆來貢天

聖六年遣驩州刺史李公顯來貢除叙州刺史既而令其子弟及其壻申承貴率衆內寇詔廣南西路轉運司發溪峒丁壯討捕之未幾卒年四十四其子德政自稱權知留後事來告哀贈公蘊爲侍中南越王命本路轉運使王惟正爲祭奠使又爲賜官告使除德政檢校太尉靜海軍節度使安南都護交阯郡王天聖九年遣知峯州刺史李倬佺知愛州刺史帥日新等來謝以倬佺爲驩州刺史日新爲珍州刺史明道元年恭謝加同中書門下平章事景祐中郡人陳公永等六百餘人內附德政遣兵千餘境上捕逐之

詔遣還仍戒德政毋得輒誅殺尋遣靜海軍節度判
官陳應機掌書記王惟慶來貢以應機爲太子中允
惟慶爲大理寺丞德政加檢校太師三年其甲峒及
諒州門州蘇茂州廣源州大發峒丹波縣蠻寇邕州
之思陵州西平州石西州及諸峒略居人馬牛焚室
廬而去下詔責問之且令捕酋首正其罪以聞寶元
元年進封南平王康定元年遣知峯州刺史帥用和
節度副使杜猶興等來貢慶曆三年又遣節度副使
杜慶安三班奉職梁材來以慶安爲順州刺史材爲
太子左監門率府率六年又遣兵部員外郎蘇仁祚

東頭供奉官陶惟懽來以仁祚爲工部郎中惟懽爲
內殿崇班明年又遣祕書丞杜文府左侍禁文昌來
以文府爲屯田員外郎昌爲內殿崇班初德政發兵
取占城朝廷疑其內畜姦謀乃訪自唐以來所通道
路凡十六處令轉運使杜杞度其要害而戍守之然
其後亦未嘗寇邊前後累貢馴象皇祐二年邕州誘
其蘇茂州韋紹嗣紹欽等三千餘人入居省地德政
表求所誘詔盡還之仍令德政約束邊戶毋相侵犯
其後廣源州蠻儂智高反德政率兵二萬由水路欲
入助王師朝廷優其賜而卻其兵至和二年卒其子

日尊遣人告哀命廣南西路轉運使尚書屯田員外
郎蘇安世爲弔贈使贈德政爲侍中南越王賻賚甚
厚尋除日尊特進檢校太尉靜海軍節度使安南都
護封交趾郡王嘉祐三年貢異獸二四年寇欽州思
稟管五年與甲峒賊寇邕州詔知桂州蕭固發部兵
與轉運使宋咸提點刑獄李師中同議掩擊又詔安
撫使余靖等發兵捕討靖遣謀誘占城同廣南西路
兵甲趨交趾日尊惶怖上表待罪詔未得舉兵聽日
尊貢奉至京師八年遣文思使梅景先副使大理評
事李繼先貢馴象九年四月戊寅以大行皇帝詔及

遺留物賜日尊加同中書門下平章事是日交趾使
辭命內侍省押班李繼和喻以申紹泰入寇本路屢
乞討伐而朝廷以紹泰一夫肆狂又本道已遣使謝
罪故未欲興兵治平初知桂州陸誥言交州來求儂
宗旦男日新及欲取温悶洞等地帝問交趾於何年
割據輔臣對曰自唐至德中改安南都護府梁貞明
中土豪曲承美專有此地韓琦曰向以黎桓叛命太
宗遣將討伐不服後遣使招誘始效順交州山路嶮
僻多潦霧瘴毒之氣雖得其地恐不能守也神宗即
位進封日尊南平王熙寧元年加開府儀同三司二

年表言占城國久闕貢臣親帥兵討之虜其王詔以
其使郭士安爲大宅副使陶宗元爲內殿崇班日尊
自帝其國僭稱法天應運崇仁至道慶成龍祥英武
睿文尊德聖神皇帝尊公蘊爲太祖神武皇帝國號
大越改元寶象又改神武五年三月日尊卒命廣西
轉運使康衛爲弔贈使予所奪州縣詔報之曰卿撫
有南交世受王爵而乃背德奸命竊暴邊城棄祖考
忠順之圖煩朝廷討伐之舉師行深入勢蹙始歸迹
其罪尤在所絀削今遣使修貢上章致恭詳觀詞情
灼見悛悔朕撫綏萬國不異邇遐但以邕欽之民遷

劫炎陬久失鄉井俊盡送還省界即以廣源等賜交
州乾順初約歸三州官吏千人之才送民二百二
十一口男子年十五以上皆刺額曰天子兵二十以
上曰投南朝婦人刺左手曰官客以舟載之而泝其
戶牖中設燈燭日行一二十里則止而偽作更鼓以
報凡數月乃至蓋以給示海道之遠也順州落南深
置戍鎮守被_口惟瘴霧多病沒陶弼亦終於官朝廷知
其無用乃悉以四州一縣還之然廣源舊隸邕管羈
縻本非交陞所有也元豐五年獻馴象二犀角象齒
百六年以追捕儂智會爲辭犯歸化州又遣其臣黎

文盛來廣西辨理順安歸化境界經略使熊本遣左
江巡檢成卓與議文盛稱陪臣不敢爭執詔以文盛
能遵乾德恭順之意賜之袍帶及絹五百匹乃以八
隘之外保樂六縣宿桑二峒予乾德哲宗立加同中
書門下平章事元祐中又數上表求勿惡勿陽峒地
詔不許二年遣使入貢進封南平王徽宗時累加開
府儀同三司檢校太師大觀初貢使至京乞市書籍
有司言法不許詔嘉其慕義除禁書卜筮陰陽曆筭
術數兵書敕令時務邊機地理外餘書許買政和末
又詔以交人自熙寧以來全不生事特寬和市之禁

宣和元年加乾德守司空建炎元年詔廣西經略安撫司禁邊民毋受安南逋逃從其主乾德之請也四年安南入貢詔卻其方物之華靡者賜敕書厚其報以懷柔之紹興二年乾德卒贈侍中追封南越王子陽煥嗣授靜海軍節度使特進檢校太尉封交趾郡王賜推誠順化功臣八年陽煥卒以轉運副使朱芾充弔祭使贈陽煥開府儀同三司追封南平王子天祚嗣授官如其父初封之制九年詔廣西帥司毋受趙智之入貢初乾德有側室子奔大理變姓名爲趙智之自稱平王聞陽煥死大理遣歸與天祚爭立求

入貢欲假兵納之帝不許十七年詔文思院製鞍韉
以賜天祚二十一年累加天祚崇義懷忠保信鄉德
安遠承和功臣二十五年詔館安南使者於懷遠驛
賜宴以彰異數進封天祚南平王賜襲衣金帶鞍馬
二十六年命右司郎中汪應辰宴安南使者於玉津
園八月天祚遣李國等以金珠沉水香翠羽良馬馴
象來貢詔加天祚檢校太師增食邑隆興二年天祚
遣尹子思鄧碩儼等貢金銀象齒香物乾道六年累
加天祚歸仁協恭繼美遵度履正彰善功臣帝自即
位屢却安南貢使九年天祚復遣尹子思李邦正求

入貢帝嘉其誠許之詔館於懷遠驛廣南西路經略
安撫使范成大言本司經略諸蠻安南在撫綏之內
其陪臣豈得與中國王官尤禮政和間貢使入境皆
庶參不復報謁宜遵舊制於禮爲得朝廷從其請淳
熙元年二月進封天祚安南國王加號守謙功臣二
年賜安南國印三年賜安南國曆日天祚卒明年子
龍翰嗣位授靜海軍節度使觀察處置等使特進檢
校太尉兼御史大夫上柱國特封安南國王加食邑
仍賜推誠順化功臣制曰即樂國以肇封既從世襲
極真王而錫命何待次升示殊禮也五年貢方物上

表稱謝九年詔卻安南所貢象以其無用而煩民他物亦止受什一十六年累加龍翰守義奉國履常懷德功臣光宗即位奉表入貢稱賀寧宗朝賜衣帶噐幣累加謹度思忠濟美勤禮保節歸仁崇謙協恭功臣及食邑焉嘉定五年龍翰卒詔以廣西運判陳孔碩充弔祭使特贈侍中依前安南國王制以其子吳昂襲封其爵位給賜如龍翰始封之制仍賜推誠順化功臣其後謝表不至遂輟加恩吳昂卒無子以女昭聖主國事遂爲其婿陳日昳所有李氏有國自公蘊至吳昂凡八傳二百二十餘年而國亡淳祐二年

詔安南國王陳日熈元賜効忠順化保節功臣增守
義二字寶祐六年詔安南情狀叵測申飭邊備景定
二年貢象二三年表乞世襲詔日熈授檢校太師安
南國大王加食邑男威晃授靜海軍節度使觀察處
置使檢校太尉兼御史大夫上柱國安南國王効忠
順化功臣賜金帶噐幣鞍馬咸淳五年詔安南國王
父日熈國王威晃加食邑八年明堂禮成日熈威晃
各加食邑賜鞍馬等物

大理國即唐南詔也熙寧九年遣使貢金裝碧玕山
氈罽刀劒犀皮甲鞍轡自後不常來亦不領於鴻臚

政和五年廣州觀察使黃璘奏南詔大理國慕義懷
徠願爲臣妾欲聽其入貢詔璘置局於賓州凡有奏
請皆俟進止六年遣進奉使天駟爽彥賁李紫琮副
使坦綽李伯祥來詔璘與廣東轉運副使徐惕偕詣
闕其所經行令監司一人主之道出荆湖南當由邵
州新化縣至鼎州而璘家潭之湘鄉轉運判官喬方
欲媚璘乃排比由邵至潭由潭至鼎一路御史劾其
當農事之際而觀望勞民詔罷方紫琮等過鼎聞學
校文物之盛請於押伴求詣學瞻拜宣聖像邵守張
察許之遂徃遍謁見諸生又乞觀御書閣舉笏扣首

七年二月至京師貢馬三百八十四匹及麝香牛黃細
氈碧玕山諸物制以其王段和譽爲金紫光祿大夫
檢校司空雲南節度使上柱國大理國王朝廷以爲
璘功并其子暉昨皆遷官少子暉爲閣門宣贊舍人
已而知桂州周種劾璘詐冒璘得罪自是大理復不
通於中國間一至黎州互市紹興三年十月廣西奏
大理國求入貢及售馬詔卻之不欲以虛名勞民也
朱勝非奏曰昔年大理入貢言者深指其妄黃璘由
是獲罪帝曰遐方異域何由得實但讎當其馬價則
馬方至用益騎兵不爲無補也六年七月廣西經略

安撫司奏大理復遣使奉表貢象馬詔經略司護送
行在優禮答之九月翰林學士朱震上言乞諭廣西
帥臣凡市馬當擇謹厚者任之毋遣好功喜事之人
以啓邊釁異時南北路通則漸減廣西市馬之數庶
幾消患於未然詔從之淳熙二年十一月知靜江府
張栻申嚴保伍之禁又以邕管戍兵不能千人左右
江峒丁十餘萬每恃以爲藩蔽其邕州提舉巡檢官
宜精其選以撫峒丁欲制大理當自邕管始云

列傳卷第二百四十七

[General Information]

书名 = 百衲本二十四史 宋史 134

作者 = (元) 脱脱等奉敕修

页数 = 181

出版社 = 商务印书馆

出版日期 = 1937

SS号 = 12460489

DX号 = 000007544233

url = http://book2.d
uxiu.com/search?&c
hannel=search>ag
=&sw=%B0%D9%F1%C4%
B1%BE%B6%FE%CA%AE%
CB%C4%CA%B7++%CB%
C%CA%B7++134&year=
§year=&seb=0&p
id=0&showc=0&fenle
iID=&Pages=1&search
htype=1